

# Mak

## Aboedi Hoafi Mak ai sürü papimarandi

---

**Son hundürüra randeimbi ai hoafi bokamarihendi**  
(*Matyu 3:1-12; Ruk 3:1-2; 3:15-17; Son 1:19-28*)

**1** <sup>1</sup>Sisas Kraiss Godindi nimorimbo aboedi hoafane nda. <sup>2</sup>Hoafi nda boatei tüküme feyo Godindi hoafi hoafiyu randeimbi Aisaia ai sürü papimarandi nahurai. God ai yahuya,  
“Ro nindou mami wandi hoafi bokarih efembohünda koandihihinani ai sihambohünda horombondifi ngumbui.

Asu ai animbo sihambohündambo nafi didibo adondeambui.

<sup>3</sup>Nimi wohi furikoatereandühi, nindou mamindi yasimondi mingiyu hoafiyowohü yahoya,  
“Adükarihbohünda nafi nafindihehindi.

Ahandi nafi dibo adondihindi, meho,” mehu. *Aisaia 40:3*

<sup>4</sup>Son nindou hundürüra randeimbi-mayu ranai nimi wohi furikoatereandühi tüküfi nimorehi nindowenihimbo Godindi hoafi bokarihendühi yahuya, “Se moaruwai hohoanimo hininggife aboedi hohoanimo süngufembo nafuimbohünda hundüründeiani animbo, God ai sihei moaruwai hohoanimo raguanambondeambui,” mehu.  
<sup>5</sup>Raniyei nindou afindi Sudahündiyei asu Serusaremihöndiyei ai Sonindi hoafi himborimbo mahei. Ai ahei moaruwai hohoanimo ra weindahi hoafimayeia Son ai Sodan himo hundürümarandüri. <sup>6</sup>Asu Son aiana hoeari kamer ninendinambo nafümbi güde mbura titapürinambo kikihirihaimarandi. Ahandi sesi ana yitih asu efu hoe raniyo sesumarandi. <sup>7</sup>Son ai nindou ranaheimbo hoafi bokarihendühi ndare hoafiyuhi yahuya, “Nindou ngörü süngu düdümbui ahandi nginindi ra wandi nginindimbo ngasündeamboane. Roana amofe ahandi sufihindi wofi ra fufurifembo nindou aboedi hamindiyahipoani. <sup>8</sup>Ro siheimbo

hoenambo hundürühandürü arihandi, nga ai animbo Yifiafi Aboedinambo hundürü-ndandürümbui,” mehu.

**Son ai Sisasimbo hundürümarürü**  
(*Matyu 3:13-17; Ruk 3:21-22*)

<sup>9</sup>Rani-simboani Sisas ai Nasaret ngoafi Gariri hifihü hiniñgire haya masünuwamboyu Son ai Sodan himo hundürümarürü. <sup>10</sup>Asu nimehünou hoe hiniñgire haya tüküfi süfu hoeireandane sünü ai bureandühiyo Yifiafi Aboedi ranai ahambo sowana wupufo nahurai makoso. <sup>11</sup>Hoafi mami sünambeahindi tüküfehü yahoya, “Se ana wandi ngusüfo pariheanineimbi nimor-anafi. Asu ro sihamboane ngusüfoambe siaoeheandi,” meho.

**Satan ai Sisasimbo moaruwai hohoanimombiyuwa**  
**yahuhaya rari hoeimariri**  
(*Matyu 4:1-11; Ruk 4:1-13*)

<sup>12</sup>Nimehünou Yifiafi Aboedi ai Sisasimbo nimi wohi furikoatereandühi koamarihera mahu. <sup>13</sup>Ranühi 40 si manüngua Satan ahambo moaruwai hohoanimombiyuwa yahuhaya rari hoeimariri. Sisas ai afoendi ninihondi babidimbo nüñguwani asu sünambeahindi nendi ai ahambo mafarihawuri.

**Sisas ai Gariri hifambe piyu haya Godindi hoafi wataporimbomarandi**  
(*Matyu 4:12-17; Ruk 4:14-15*)

<sup>14</sup>Son ai karabusi-mefiyua asu Sisas ai Garirihü tüküfi, Godindimayo aboedi hoafi ra bokamarihendi. <sup>15</sup>Ai aboedi hoafi ra wataporimborandühi yahuya, “God ai hoafimayu si ra ndeara tüküfehü asu ahandi nginindi hifandarandi ra ndeara akimi tüküfemboane. Nga se moaruwai hohoanimo ra hiniñgindihi hehi aboedi hohoanimo süngundihindi,” mehu.

**Sisas ai nindou yimbuyimbu hoafimayua ahandi süngu mahomo**  
(*Matyu 4:18-22; Ruk 5:1-11*)

<sup>16</sup>Sisas ai kurihoe Gariri himborikimi huhü Saimon Andru apodohombo hoeimareapiri. Ai andürü kurihoeambe mafaorineandi, ai kini wowariyafani rinandeimbi nindou wambo. <sup>17</sup>Sisas ai ahafanimbo hoafiyupirühi yahuya, “Se mborai wambo süngundinandiri ndinandi, rananimbo ro sihafanimbo nindou semindimbo yamundiheapirimboyah,” mehu. <sup>18</sup>Asu ai nimehünou andürü sihene hena ahandi süngu mahafani.

<sup>19</sup>Ai akidou sühüfi hu Sebedindi nimori yimbu, Sems Son apodohombo botambe nimarifanimbo andürü diboadomarineanda hoeimareapiri. <sup>20</sup>Sisas ai ahafanimbo hoafimayupiramboyafani, ahafandi afindi Sebedi

asu mami ratüpuriyomo rundeimbi nindou botambe hiniŋgirineapuri hena, Sisasindi süngu mahafani.

**Sisas ai nindou mamindi fiambeahindi  
moaruwai nendi hihaimafoareandi  
(Ruk 4:31-37)**

<sup>21</sup>Sisas ai ahambo süngururü-rundeimbi babidimbo moani ŋgoafimbo nimari sihi Kaperneam ŋgoafinambo mahifomo. Rani-simboani ai Suda-yei rotu worambe kefuai hafu nimorehi nindowenihimbo Godindi hoafi yamundimareandüri. <sup>22</sup>Raniyei asu ai ahandi yamundife hoafi ranahambo hepünimehindi. Sapo ai moai ahinümbi hohoanimo yamundu rundeimbi nahurai yamundeandi, ŋga nindou adükari ŋginindeimbi nahurai yamundimareandüri. <sup>23-24</sup>Rani-simboani nindou mami moaruwai nendi nimarümbi-mayu ranai Suda-yei rotu worambe nimarü puküna hoafi karihoehü yahuya, “Sisas, Nasaretihündi, se yohoeffimbo nini nünüŋgufemunimboyafi masinifi? Yihoefombo moaruwaimbo-fimunimbo safimboyafi? Ro fifiriheanini. Se ana Godindi mbumundi nindou-anafi,” meho. <sup>25</sup>Asu Sisas ai moaruwai nendambo ŋginindi hoafiyuhi yahuya, “Se hoafi kikirandifi hawa kosifoao,” mehundoamboyo. <sup>26</sup>Asu moaruwai nendi ranai nindou ranahambo yabadiri hiniŋgireri mbura hoafi moani puküna karihoai haya nindou ranahandi fiambeahindi makosifoendi. <sup>27</sup>Raniyo asu muŋguambo nimorehi nindowenihü ranai hepünahindühi aheihoari simbori hoafiyehi seiya, “Nini-moatükuniyo nda yahurai tüküme feyoa? Nindou ndanai simbori moatükuni bogori nindou nahurai yamundimareandi. Asu ai moaruwai nendambo hoafimayua ahandi hoafi himborimayei,” masei. <sup>28</sup>Raniyo asu Sisasindi hoafi ranai nimehünou muŋguambo hifi Garirihü ra hoango wakimareandi.

**Sisas ai Pitandi yamoŋgoamindi aboedimareandi  
(Matyu 8:14-15; Ruk 4:38-39)**

<sup>29</sup>Sisas ai ahambo süngururü-rundeimbi babidimbo Suda-yei rotu worambeahindi tüküyafu houmbo Sems weimbo Son babidimbo Saimon weimbo Andru-yafandi worinambo mahomo. <sup>30</sup>Saimonindi yamoŋgoamindi ai aŋgünumbo fondihü mapowa asu ahandi aŋgüni ranahambo nimehünou Sisasimbo hoafimehündo. <sup>31</sup>Raniyo Sisas ai hüfu ahandi watiŋarühi kikihiramündü botimareanda asu aŋgüni ahandi ranai nimehünou makosifoenda asu sesi sindimarandi.

**Sisas ai nindou afindi aboedimareandüri  
(Matyu 8:16-17; Ruk 4:40-41)**

<sup>32</sup>Mami rani nimbambe hüfihamindi hürimindowa nindou ranai nimorehi nindowenihü aŋgünümbi asu moaruwai nendeimbi

fufurühümündihündüri Sisas sowana mafandihindi. <sup>33-34</sup> Muṅguambo nindou ṅgoafihündi ranai hei wori Sisas nimarümbi rani yipurikimi burimayeia Sisas ai afindi nimorehi nindowenihi muṅguambo mamikarambo ṅṅünümbi aboedireandüri asu moaruwai nendi afindi raguanamboreandüri marandi. Asu moaruwai nendi ranai ahambo fifirihori ranimboyu ai aheimbo yowani akidou amboani hoafiyopoani mehündüri.

**Sisas ai Garirihü hoahoṅgu wakimareandi**

*(Ruk 4:42-44)*

<sup>35</sup> Sisas ai siambe hondü nimbi hoṅgiri kiaroambe botifi haya hu gorügoanini nindou nimarikoateyohü Godimbo didibafiyuhü mamaru. <sup>36</sup> Asu Saimon ai ahandi ṅṅunindi babidi Sisasimbo kokomaruri homo. <sup>37</sup> Ai homo hoeirüwuruhi hoafiyomo-ndowohü yahomoya, “Muṅguambo nindou ai sihambo kokorihüninühanei,” mehomo. <sup>38</sup> Sisas ai ahamumbo hoafiyupuruhi yahuya, “Ṽṅgorü ṅgoafi akimi adaburo ranambo ṅgefo. Rananimbo ro aheimbo amboani Godindi hoafi hoafindahandüri. Ranimboyahi ro nda masinihi,” mehu. <sup>39</sup> Asu Sisas ai muṅgu Gariri hifihü hoahoṅgu wakireandühi, Suda-yei rotu worambe hu, Godindi hoafi bokarihendühi asu moaruwai nendambo hihaifoareandüri marandi.

**Sisas ai nindou mami mimaniho masimeimbi aboedimariri**

*(Matyu 8:1-4; Ruk 5:12-16)*

<sup>40</sup> Nindou mami mimaniho masimeimbi ai hu Sisasindi yirikimi piyu nimarumbo hüti hoafirürühi yahundoya, “Se refembo yifirayafi ana, wandi mimaniho masimei ra aboedindowandiri,” mehundo-amboyu. <sup>41</sup> Asu Sisas ai ahambo hipoamborirühiyu, ahandi warinambo sündirühi yahundoya, “Refembo samboanahi, ṅga se aboediyafu,” mehu. <sup>42</sup> Raniyo masimei ranai nimehünou didikirifoendühiyo asükai nindou ranai aboedimayu. <sup>43-44</sup> Sisas ai nindoumayu ranahambo ṅgoafinambo koarisherühi asükaiyu hoafiyundowohü yahundoya, “Se yowani nindou mamimbo amboani sihafi fi ranahambo hoafiyopoani. Ṽṅga se ṅgafi Godimbo sihai-randeimbimbo sihafi fi ra nafuindafindo. Rananimbo Mosesindi ahinümbi hoafimayo süṅgu sihafi fi aboedi tüküme Feyo ra aheimbo nafuimbohünda Godimbo sesi mbisihenda-mboane,” mehu. <sup>45</sup> Ṽṅga asu nindou ranai hu Sisas ai ahambo aboedimariri ranahambo waporimbo-maranda asu Sisas ramareandi hoafi ra muṅguambo ṅgoafi hihimborimaye. Ranimboyu Sisas ai nindou hoeindi-hindiri-mboyei yahuhaya moai mami ṅgoafi amboani hu. Ai nindou niṅgo-koateyeihi manüṅguyosi, ṅga asu nindou ranai muṅguambo hifihündi ahambo sowana hei marihündi.

**Sisas ai nindou yiriwari moaruwaimbü aboedimariri**  
(*Matyu 9:1-8; Ruk 5:12-16*)

**2** <sup>1</sup>Yahunümbi si ho hayamboyoane Sisas ai asüakai Kaperneam ngaoafinambo hihirifi mahu. Raniyo ai hu worambe amaru hoafi ra mahoango. <sup>2</sup>Nindou afindi ranai fandambo wori ranai tühüforeandühi moai yipurikimi amboani fondi akidou niango. Raniyo Sisas ai aheimbo Godindi hoafi yamundeandürühi mamaru. <sup>3</sup>Yimbu-yimbu nindou ai nindou yiriwari moaruwaimbü ra fondiwami foarüwuri mburu sowaründümo mahifomo. <sup>4</sup>Nindou ranahambo Sisas sowanambo semündü hifombo nindou afindiwambo nafi gümareandamboyo hafomo woriwami Sisas nüngu simogodühi hifinambo titirundeimbi wori ranambe wangetyanjirihou mburumbo fondi kameihü masafoarüwuri. <sup>5</sup>Raniyu Sisas ai nindou ranahamundi anihondümbofe ra hoeireanda mayoa, nindou yiriwari moaruwaimbü ranahambo hoafiyundowohü yahuya, “Nindou hoarifi, sihafi moaruwai hohoanimo ranana amboawi sambo-anahi,” mehu. <sup>6</sup>Asu ahinümbi hohoanimo yamundu rundeimbi bidifiri ranühi mamarimo ranai ahamundihoari ngusüfoambe raru hohoanimoyomondohü yahomoya, <sup>7</sup>“Nimboe nindou ndanai hoafi yahurai hoafayua? Ai Godiyupoani yahurai hoafayu. God mami yangiri animbo moaruwai hohoanimo ra amboawi mbüsümbui,” mehomo-ndamboyu. <sup>8</sup>Sisas ai nimehünou ahinümbi hohoanimo yamundu rundeimbi-yomondi hohoanimo ra fifireandi. Raniyu ai hoafiyupurühi yahuya, “Nimboe se ndani moatükuni nda raru hohoanimoemoa? <sup>9</sup>Nine hoafiyu nindou yiriwari moaruwai ndanahambo hoafimbo hiniñgirouayoa? Ro hoafiyahühi sahiya, ‘Sihafi moaruwai hohoanimo ranahambo amboawi,’ asahiyo asu ‘Botiyafo sihafi fondi sowandifi hawa hafi,’ asahiyo. Ijga yimbu ra hoafimbo ro nginindeimb-anahi. Asu yimbu hoafi ra hoafimbo nahaniyo hiniñgirouayo asu nahaniyo tinjumbayo? Yibobo ro hoafindahani anihondümbo tükündifemboe. <sup>10</sup>Ijga ro sihamumbo rani-moatükuni ra fifirindundi asahi, Nindou Hondü ai hifi ndanühi moaruwai hohoanimo amboawi yahombo nginindeimbani,” mehu. Raniyo asu Sisas ai nindou yiriwari moaruwaimbü mayu ranahambo hoafiyundowohü yahuya, <sup>11</sup>“Ro sihambo hoafayahanini, botiyafo sihafi fondi sowandifi hawa worinambo hafi,” mehundo-wamboyu. <sup>12</sup>Nindou afindi meñgoro ranahei himboahü yiriwari moaruwaimbü mayu ranai nimehünou botifi ahandi fondi semündü haya mahu. Raniyo nindou afindi meñgoro ranai hepünahindühi Godimbo aboedani sei hoafiyehi, “Moai horombo ro ndahurai moatükuni hoeirihundi,” masei.

**Sisas ai Rifaimbo mborai wandi süngu mehu**  
(*Matyu 9:9-13; Ruk 5:27-32*)

<sup>13</sup>Sisas ai asüakai hihirifi haya Gariri kurihoe himbori kimi hüfuane nindou afindi meñgoro ranai ahandi süngu tümare hoamboyu asu

Godindi hoafi yamundimareandüri. <sup>14</sup> Ai huhündamboyu Rifai Arfiusindi nimori ai ahandi takis kaki semindi worambe mamaruwa hoeimariri. Raniyu Sisas ai hoafiyundowohü yahuya, “Mborai wandi süngu,” mehundo-wamboyu Rifai ai botifi haya Sisasindi süngu mahu. <sup>15</sup> Sisas ai ahambo süngururü-rundeimbi babidimbo Rifaindi worambe takis kaki sowandümo rundeimbi nindou-yomo asu moaruwai hohoanimoyomo rundeimbiyomo ai-babidimbo nimarimo masowasümo. Nindou yahurai ranai muŋguambo si Sisasimbo süngururü marundi. <sup>16</sup> Farisihündi ahinümbi hohoanimo yamundurundeimbi ranai hoeirundane Sisas ai takis kaki sowandümo rundeimbi asu moaruwai hohoanimoyomo rundeimbi nindou babidimbo sesi masesu. Raniyomo ahambo süngururü-rundeimbimbo düdurüpurühi yahomoya, “Nimboe Sisas ai takis kaki sowandümo rundeimbi asu moaruwai hohoanimoyomo rundeimbi nindou babidimbo nimarumbo sesi sesü maranda?” mehomo. <sup>17</sup> Sisas ai rani hoafi ra himboriyu haya ahinümbi hohoanimo fifirundeimbi ranahamumbo hoafiyupurühi yahuya, “Nindou angüni-koate ana moai dokta sowanambo hei rihündi, nga angüneimbi anei hei arihündi. Mami yahuriane ro makosahi nda mbumundi nindou anefi seimbi nindou ranaheimbo mborai yahombo-yahipoani, nga nindou moaruwai hohoanimoyei rihündeimbi seirihündeimbi ranaheimbo mborai yahomboyahi,” mehu.

**Sisas ai sesi wehisaombo hoafi yamundimareandi**

*(Matyu 9:14-17; Ruk 5:33-39)*

<sup>18</sup> Sonimbo süngururü-rundeimbi asu Farisi-yomondi süngurundeimbi ai mamimbo sesi wehimemo. Raniyo asu nindou bidifiri ai homo Sisasimbo düdurüwurühi yahomoya, “Nimboe Sonimbo süngururü-rundeimbi asu Farisi-yomondi süngurundeimbi ai sesi wehisaoyomo arundi, nga asu sihafi süngurunini rundeimbi ana moai sesi wehiyomo rundi?” mehomo-ndamboyu. <sup>19</sup> Asu Sisas ai yare hoafiyupurühi yahuya, “Nindou mami nimorehi semindimbo sihi ai babidimbo nünguambe ra sesi wehimandeyo? Nindou nimorehi semindimbomayu ranai ai-babidimbo nünguambe ana ngiri sesi wehindei. <sup>20</sup> Iga süngunambo nindou ranahambo ndowaründümo ngomondani ai-babidimbo niŋgokoate-ayuanbe animbo sesi wehindeimboyei. <sup>21</sup> Nindou mami aiamboani moai hoeari goesüri simbori semündü haya wamindafi ngisihari hoeari fihü pare kakiyu randi. Rawareandi ana, boboe-ndandani asu hoeari goesüri simbori ranai akidou yanggiri yagodi mbunda ngisihari hoeari ra hirindeamboe. Hoeari goesüri simbori rananai wamindafi ra hirindeandani asu ambe afindi niŋgomboe. <sup>22</sup> Asu nindou ngorü ai simbori wain hoe ra wamindafi wain hoe ninihondi hoeari hipiri ranambe ngiri kandeandi. Rawareandi ana, hipiri ranai borindifeihü

wain hoe ranai keboemboe. Iŋga simbori wain hoe ana hipiri simbori ambe femboane,” mehu.

**Moani nimarimbo sihi ratūpurikoatembo hoafi**

*(Matyu 12:1-8; Ruk 6:1-5)*

<sup>23</sup>Mami ŋgoafimbo nimarimbo sihi Sisas ai ahambo süngururū-rundeimbi babidimbo wit nūmbūri mbusūmo mahomo. Raniyo ahambo süngururū-rundeimbi ai wit ahuri bidifiri hūrimarūdūmo. <sup>24</sup>Asu Farisihūndi ai Sisasimbo dūduruwūri yahomoya, “Nimboe sihambo süngurunini rundeimbi ai moani nimarimbo sihi ahinūmbi ra rawarunda?” mehomondamboyu. <sup>25</sup>Asu Sisas ai simbori hoafiyupurūhi yahuya, “Awi se Defit ai ahandi wandafi mami babidimbo sesikoate wembomboyomōdūhi ramareandi ra hoeirundai waniyo? <sup>26</sup>Sapo Abaiatar ai Godimbo sesi sihairandei-mbimbofi nimarumbe Defit ai Godindi ser worambe kefuai hüfu bret Godimbo masihoundi ra masesu. Bret ranana Godimbo sesi sihou-rundeimbi yangirane sowasūmo arundi. Iŋga Defit ai sesūhi ahandi wandafi mamimbo bidifiri masagapuri ra moai fifirundiyo?” <sup>27-28</sup>Sisas ai asūkai Farisimbo hoafiyupurūhi yahuya, “Moani nimarimbo si ranahambo fehefemboyopoani God ai nindou nafimarandi. Iŋga moani nimarimbo si ranai nindoumbo mbifariheirambo yahuhayamboyu nafimarandi,” mehu.

**Sisas ai nindou watiŋari moaruwaimbū aboedimariri**

*(Matyu 12:9-14; Ruk 6:6-11)*

**3** <sup>1</sup>Asūkai ŋgorū-simboani Sisas ai Suda-yafe rotu worambe kefuai hüfuane nindou watiŋari moaruwaimbū ai ranūhi mamaru. <sup>2</sup>Raniyo nindou bidifiri ai Sisasimbo himboari safūhimarūwuri moani nimarimbo sihi nindou watiŋari moaruwaimbū ra aboedindira papihoafindihuri yahomo houmbo. <sup>3</sup>Sisas ai nindou watiŋari moaruwaimbūmayu ranahambo hoafiyundowohū yahuya, “Botiyafō ndūhi sūhūfani muŋguambo hoeimbirihini,” mehu. <sup>4</sup>Raniyu Sisas ai dūdureandūrihiya, “Nini-moatūkuniyo moani nimarimbo sihi refembo ahinūmbi ra aboedayo, aboedi moatūkuni refemboyo moaruwai moatūkuni refemboyo? Nindou hifokoefemboyo asu nindou aboedambōfemboyo?” mehu. Iŋga ai moai simbori ahambo akidou amboani hoafiyomo. <sup>5</sup>Sisas ai nindou ranahamumbo hūbudurapuri wakireapurane asu ahamundi ŋgusūfoambe ranai tapihamimayowamboyu hihifi-hihifi-koatemayu. Raniyu asu nindou watiŋari moaruwaimbū ranahambo hoafiyundowohū yahuya, “Sihafi watiŋari ŋgurihao,” mehua ŋgurimarihenda aboedi tūkūmefeyo. <sup>6</sup>Raniyo Farisi nindoumemo ranai wori ra hiniŋgiru houmbo homo Herotindi nindou babidi Sisasimbo hifokoefimbo hoafi fimarūdūmo.

**Nindou afindi ranai Sisasimbo süngumarihori**  
(*Ruk 6:17-19*)

<sup>7</sup>Sisas ai ahambo süngururü-rundeimbi babidimbo Gariri kurihoenambo mahomonda asu nindou afindi ranai ahamumbo süngumarihüpuri hei. <sup>8</sup>Sisas ai nindou yamunde asu aboedire arandi hoafi ra himboriyei hehi, nindou afindi Gariri, Sudia, Serusarem, Idomia, hifi Sodan hoekimi adaburo, Tair asu Saidon ŋgoafi ranihündi ranai Sisas sowana mafandihindi. <sup>9</sup>Sisas ai nindou afindi ra hoeireanda mayowamboyu ahambo süngurururü-rundeimbimbo hoafiyupurühi yahuya, “Nindou afindane eŋgoro, ŋga se bot ŋgorü sowandümo sifomo, ŋga afindi afindindeihi wambo hoe hohoeani ninendi-hündürimboyei,” mehupuri. <sup>10</sup>Sisas ai horombo nindou afindi aboedimareandüri ranimboyei aŋgünümbi nindou afindi ranai Sisasimbo sündifimbo simbori ninendürimayei hei. <sup>11</sup>Asu moaruwai nendi ranai Sisasimbo hoeirhorani mayoa ahandi wagabe piyei nimareimbo puküna hoafi karihehindühi seiya, “Seana Godindi nimor-anafi,” masei. <sup>12</sup>Ŋga Sisas ai aheimbo nüŋgunahurai nindouyu yaho fifirife hoafimbo yowani mehündüri.

**Sisas ai ahandi hoafi semindi horambo nindou**  
**12 kafaore hiniŋgimareapuri**  
(*Matyu 10:1-4; Ruk 6:12-16*)

<sup>13</sup>Ai hafu hifi wafuwami nimarümbi nindou dideyomo ai hohoanimoyupureimbi ahamumbo hoafimayua ahambo sowana mahafomo. <sup>14-15</sup>Sisas ai nindou 12 sepurimündi hiniŋgireapuri haya hoafi sowandümo homo-rundeimbi anemo yahu kamafoareapuri. Nindou ranai Sisas babidimbo niŋgombo ai koarihefepura ho Godindi hoafi bokarihefehü asu moaruwai nendi hihaifoefembo ŋginindi masagapuri. <sup>16</sup>Sisas ai nindou 12 ndanahamumbo masepurimündu: Saimon, asu Sisas ai ŋgorü ndüri Pita kamafoariri. <sup>17</sup>Sems, Son Sebedindi nimori. Sisas ai ahafanimbo Boanerges anafani yahu dükamareapiri. Ahandi nimindi ra nimoamondi hoafi nahurai nindouane. <sup>18-19</sup>Andru, Firip, Bartoromyu, Matyu, Tomas, Sems, Arfiusindi nimori, Tadius, Saimon Serot<sup>a</sup> sirambeahindiyu asu Sudas Iskariot Sisasimbo ahandi hürütümbi-yomondi warihümariri.

**Sisas ai Bersebur kapeihü ratüpurayu masei**  
(*Matyu 12:24-32; Ruk 11:14-23; 12:10*)

<sup>20</sup>Sisas ai worinambo huani asükai nindou afindi ranai hei wori gümarihori. Ranimboyu ai ahambo süngururü-rundeimbi babidimbo sesi

---

<sup>a</sup> 3:18-19 Serot ai Rom hoarehi nimarimbo moei yahomo-ndeimbanemo.



sesi-koatememo. <sup>21</sup>Sisasindi fikiminindi ai rani hoafi ra himboriyei hehi ahambo fihimündimbo mahei. Sapo ai hohoanimoyeihiya, ai wunünümbo-yuhümbei sei hehi. <sup>22</sup>Ŋga Serusaremihündi ahinümbi hohoanimo yamundu-rundeimbi ai hanimo hoafiyomondühiya, “Ahandi fiambe Bersebur mbamarü. Aiana moaruwai nendiyei bogori Bersebur ahandi ŋginindi-namboane moaruwai nendi nindouyei fiambeahindi hefoare arandi,” mehomom. <sup>23</sup>Sisas ai nindou ranaheimbo hoafiyundüra akimi maheia kafeefe hoafi hoafiyundürühi yahuya, “Satan ai nüngunde Satanimbo hemoaboadirä? <sup>24</sup>Asu mami hifihündi ai yibobore haya yifiarayo ana, rani hifihündi ranai ŋgiri aboedi nimandei. <sup>25</sup>Asu mami worambeahindi ai yiboborühi hehi yifiaraye ana, ai ŋgiri aboedi nimandei. <sup>26</sup>Asu Satan ai yifiarimbo yahuhaya ahandi nendi ranai yiboboareandi ana, ŋgiri ŋginindi ningo, ŋga ai raniwami randühi moendi-ndeimboyei. <sup>27</sup>Ŋgiri nindou ŋgorü ai ŋginindi nindoundi worambe ŋgu napo hümbuhünindu. Sapo nindou ranai hümbuhünimbo hohoanimoayu ana, ŋginindi nindou ranahambo wofinambo hüputüpondüherü mbundambo animbo asu ahandi napo muŋgu ra fufundamündümbui. <sup>28</sup>Ro siheimbo anihondümbo-anahi hoafehandüri, nindou ai Godimbo moaruwai hoafaye ane asu moaruwai hohoanimoaye ane ra amboawi mbüsümbui. <sup>29</sup>Ŋga nindou ŋgorü ai Yifiafi Aboedimbo moaruwai hoafayu ana, God ai ŋgiri amboawi mbüsü, hapondani-ane asu süngunamboane. Ŋga moaruwai hohoanimo ranai ahambo-so koadürümbo koadürümbo yagodimboe.” <sup>30</sup>Sisas ai rani hoafi hoafimayu ra sapo ahinümbi hohoanimo yamundu-rundeimbi ai ahamboya, ‘Moaruwai nendi ahandi fiambe nimarimboane,’ mehomom-ndamboyu ra-mehu.

### Sisasindi fikiminindi

(*Matyu 12:46-50; Ruk 8:19-21*)

<sup>31</sup>Rani-simboani Sisasindi hondi asu akohoandi ai ahambo fihambo tükümehind. Ai moanambühi nimboeimbo aheimbo sowana hombo hoafimbo nindou mami koamarihehori. <sup>32</sup>Nindou afindi ranai Sisasimbo wakirihori nimareimbo hoafiyahündowohü seiya, “Sihafi amondi aborüdi ai sihambo weindani niboadei hifandarihünini,” masei-amboyu. <sup>33</sup>Asu Sisas ai simbori hoafiyundürühi yahuya, “Didiyei wandi me asu akohoanda?” <sup>34</sup>Nindou wakirühi mamarei ranaheimbo hübudurandüri wakirerühi yahuya, “Ndananei wandi me asu akohoand-aye. <sup>35</sup>Wandi me, akohoandi asu rehihoandi ana nindou didiyei Godindi hohoanimo süngurihindeimbi rananei,” mehu.

### Sesi ahuri nümbürambe bubufoefembo kafeefe hoafi

(*Matyu 13:1-9; Ruk 8:4-8*)

**4** <sup>1</sup>Sisas ai asüakai Gariri kurihoe kimi nindou yamundife ratüपुरi ra botimareandi. Nindou afindi ranai ahandi hoafi himborimbo

mafandeanda botambe farifi hoe hangifo-wami mamaru. Asu nindou ranai gudiani hoe kimi mamarei. <sup>2-3</sup>Sisas ai aheimbo kafoefe hoafinambo yamundeandürühi yahuya, “Nindou mami ai nümbürambe hu sesi ahuri bubumarandi. <sup>4</sup>Ai hu sesi ahuri ra buburandane bidifiri ai nafini pütapimayoa ndu ai tüküyahi masahüsi. <sup>5</sup>Bidifiri nimoei yahafi safambe hifi akidou yangiri niñgowambe pütapimayo. Hifi ra ragu hanikoate-wambo ahuri ranai nimai tütükimayo. <sup>6</sup>Ŋga asu hüfihamindi ai piyowohüyo ahuri hapoadümbo maforo ra sore soremarandi. Sapo ahasihari ranai hifambe ragu hanikoate-wambo asu mungu yapataparimayo. <sup>7</sup>Asu bidifiri ahuri ranai tihoari tihoarümbi wofi ranambe pütapimayoa gabudandühi hisikoatemayo. <sup>8</sup>Asu ahuri bidifiri ai hifi aboedambe safi pütapiyowohü hisimayo. Nimindi mami ranahandambo bidifiri ai 100 hisiyo, asu bidifiri ai 60 hisiyo, asu bidifiri ai 30 hisiyo,” mehu <sup>9</sup>Hoafi moendifembo yahumbo Sisas ai hoafiyundürühi yahuya, “Nindou ai himbo-ambeimbindühi ana, hoafi nda himborimbiyu-wamboane,” mehu.

**Sisas ai nimboe kafoefe hoafinambo wataporimbomarandi**  
(*Matyu 13:10-17; Ruk 8:9-10*)

<sup>10</sup>Süñgunambo nindou afindi ranai buküreoendane Sisas yangiri mamaruwa ahandi süñgururü-rundeimbi 12-yomo asu nindou ahambo süñgurihori-rihündeimbi ai kafoefe hoafi ranahambo düdumehindi. <sup>11</sup>Asu Sisas ai simbori hoafiyundürühi yahuya, “God ŋginindi hifandarandi ranahandi dibo hoafi nimindi ra se fifirifembo-hünda God ai masagadüri, ŋga nindou weindani maniboadei ranaheimbo ana kafoefe hoafi yangiriyo hoafimayu. <sup>12</sup>Ranimboane,  
Ai afindimbo himboari papindeimboyei,  
ŋga ai ŋgiri türüboadihi fifirindihindi.  
Ai afindi hoafi himborindeimboyei,  
ŋga ahandi nimindi ŋgiri fifirindihindi.  
Ranimbo-animbo ai wambo sowana asükai hihirindahi dideiyani  
God ai ahei moaruwai hohoanimo ra amboawi mbüsümbui,”  
*Aisaia 6:9-10*

mehu.

**Sisas ai sesi ahuri ranahandi nimindi fifire hoafimayu**  
(*Matyu 13:18-23; Ruk 8:11-15*)

<sup>13</sup>Sisas ai ahamumbo hoafiyupurühi yahuya, “Awi se kafoefe hoafi ranahandi nimindi ra moai fifirundiyo? Asu refeana bidifiri amuri kafoefe hoafi ra nüñgundu fifiri-mandunda? <sup>14</sup>Nindouyei mbusümo Godindi hoafi wataporimboayo ana, sapo nindou sesi ahuri nümbürambe buboafoareandi nahuraiane. <sup>15</sup>Hoafi nafini pirayo ana, sapo nindou

Godindi hoafi himboriyeihanei, nga Satan ai nimehünou hoafi ra nindouyei mbusümonindi semündü raguanambo-reandühani. <sup>16</sup>Bidifiri sesi ahuri nimoei yahafisafambe pütapimayo nahuraiane. Ai Godindi hoafi ra himboriyei hehi nimehünou semindimbo hihifi-hihifiyeihi-anei. <sup>17</sup>Ŋga ai moai hoafi ra ndorihahi sahümündia ahei ngusüfoambe ragu nginindi nimaro, nga ai moani akidou yanggiri nginindi nimboeihahi-anei. Ai Godindi hoafi himboriyei masahümündi ranahambo refe hoeifembo nindou ngorü ai tinjirifo sehindani nimehünou hiniŋgirihindühi-anei. <sup>18-19</sup>Bidifiri ai sesi ahuri tihoari-tihoarümbi wohambe pütapimayo nahuraiane. Nindou ranai hoafi himboriyeihaneisi, nga ai hifindi moatükunimbo afindi hohoanimoyeihahi napo afindi semindimbo ngusüfo parihindühi Godindi hoafi ranahambo gabudifoareanda asu ahuri ranai nggiri hisindo. <sup>20</sup>Asu sesi ahuri hifi aboedambe bubumayoa aboedi tükefeyo ranana sapo nindou düdi ai hoafi himboriyu haya fifireandühi tümafoareandi nahuraiane. Raniyo bidifiri ai hisi aboedi hisiyowohü bidifiri ai 100 hisiyo, bidifiri ai 60 hisiyo, asu bidifiri ai 30 hisiyo marandi,” mehu.

#### **Sisas ai moaruwai nendi hemafoareandi**

*(Ruk 8:16-18)*

<sup>21</sup>Sisas ai ahambo süngururü-rundeimbimbo hoafiyupurühi yahuya, “Awi nindou ai ram hai wambüri asu fondi hoarehi dibonapimandihyo? Wani, nga ram ra fondiwami nimoamo ane nindihi arihündi. <sup>22</sup>Muŋguambo moatükuni haponda dibombo engoro ra süngunambo ana weindahi tükündifemboe. Asu nine-moatükuni gabudihahi masihendi ra süngunambo ana weindahi yagodomboe. <sup>23</sup>Nindou ai himboambeimbindühi ana, hoafi nda himborimbiyu-wamboane,” mehu. <sup>24</sup>Asükai hoafiyupurühi yahuya, “Hoafi himborayomo ra se wudüpoapondü hohoanimondimo. Se nindoumbi yimbuarihindüri rani simogodühi animbo God ai siheimbo yimbundearühi asu ngorü bidifiri pandeambui. <sup>25</sup>Nindou düdi ai bidifiri moatükuneimbayü ana, God ai asükai bidifiri dagadombui. Ŋga nindou düdi rani-koateayü ana, nine akidou ahandi warambeahindi ra ndemündü raguanambo-ndeambui,” mehu.

#### **Sisas ai sesi ahuri tükefeyo kafeefe hoafi hoafimayu**

<sup>26</sup>Sisas ai asükai hoafiyuhahi yahuya, “God nginindi hifandarandi ranana nindou sesi ahuri nümbürambe bubofoareandi nahuraiane. <sup>27</sup>Nindou ranani apuwaniyo asu yanggiri ahandi ratüpuri ratüpuriyuwaniyo nimbokoani sirühi sesi ahuri adükari tükefeyo ra ai moai fifireandi. <sup>28</sup>Hifi yanggirane sesi ahuri ra rareanda adükari tüküfehü hisiyo arandi. Ai moai fifireandi nüngureambombai weangurühi emündi boatei

tükündife mbunda mbiro ahuri tükündifihü animbo ranambe hisi tükündifemboe. <sup>29</sup>Hisi ranai ho nginginidiyowa nümbüri aharambüri ranai yimungure-mindimboyo simboani yimunguramüdi arandi,” mehu.

**Sisas ai hoari akidouhüdi adükari tüküfembo  
kafoefe hoafi hoafimayu  
(Matyu 13:31-32; Ruk 13:18-19)**

<sup>30</sup>Sisas ai asükai hoafiyuhi yahuya, “Sihiri God nginginidi hifandarandi ranahambo nüngunahuraiane mambisefa? Ranahambo hoafimbo nini-kafoefe hoafinambo hoafimandefa? <sup>31</sup>God nginginidi hifandarandi ranana hambomo hoari nahurai akidou ahandi ndüri mastet hoari hifi kararowandi nahuraiane. <sup>32</sup>Ŋga hifefeyo ana, tikoani nahurai tüküfe haya adükari hamindi amuri nümbürambeahindi sesi ranahambo nğasündeandühane. Ranane afindi düdüdü papire haya niñgowani, ndu ai hei raniwami nğisiharühi ngeramborühi arihüdi,” mehu.

**Sisas ai kafoefe hoafinambo hoafimayu ranahandi nimindi  
(Matyu 13:34-35)**

<sup>33</sup>Sisas ai nimorehi nindowenihi afindi ranaheimbo kafoefe hoafi afindi wataporimbomarandi ahei hohoanimo ra simogodühi. <sup>34</sup>Ai ranaheimbo kafoefe hoafinambo yangiri wataporimborandüri marandi. Ŋga ahambo süngururü-rundeimbi aiyangiri nimarimondani ana, hoafi ranahandi nimindi ra yamundeapuri-marandi.

**Sisas ai hoeweri hoafimayua afurimareandi  
(Matyu 8:23-27; Ruk 8:22-25)**

<sup>35</sup>Mami rani nimbambe ahambo süngururü-rundeimbimbo yahuya, “Sihiri Gariri kurihoe ra ngorü-goanini ngefomboane,” mehupuri. <sup>36</sup>Raniyo nimorehi nindowenihi afindi ra raru hinñgirüwuri houmbo bot Sisas mamaru ranambe fareafu houmbo sowarüdümo mahomo. Asu bot bidifiri amuri ranai amboani ai-babidimbo maho. <sup>37</sup>Ai hifomondane, Gariri kurihoe ranambe nginginidi hamindi weri ranai tüküme Feyo. Raniyo hoe ranai hafo kaifoairandühi tükühefembo yangirimayo. <sup>38</sup>Asu Sisas ai daboarani pirowami mbiro nande haya apuane, ahambo süngururü-rundeimbi ai yangiri ruwurühi yahomoya, “Nindow Yamundo-randeimbi, sihiri yifimbo yangirayefi ranahambo awi se moai hohoanimoyafiyo?” mehomondamboyu. <sup>39</sup>Sisas ai botifi hoe asu weri ranahafembo nginginidi hoafiyupirühi yahuya, “Rühüsafi kikindandife,” mehua hoafi niñgowambe kikamindühiyo hoe asu weri ai afure pimareandi. <sup>40</sup>Sisas ai ahambo süngururü-rundeimbimbo hoafiyupurühi yahuya, “Nimboe se yihimboayomoa? Awi se anihondümbofe-koate-wamboyomo?” mehu. <sup>41</sup>Ahambo süngururü-rundeimbi ai ahamundihoari simbori

ndüwuriyomondühi yahomoya, “Nindou nda nüngunahurai nindouyua? Moani hoe afindi-afindimayo asu weri ranai ahandi hoafi himboriyafehü afurimarineandi,” mehomomo.

**Nindou mamindi fiambeahindi Sisas ai  
moaruwai nendi hemafoareandi  
(Matyu 8:28-34; Ruk 8:26-39)**

**5** <sup>1</sup>Sisas ai ahambo süngururü-rundeimbi babidimbo Gariri kurihoe ra botambe barihoemo houmbo Gerasa-yafe hifambe mahomo. <sup>2</sup>Sisas ai bot hiniñgire haya kusifuendaniyo, nindou mami ahandi fiambe moaruwai nendi nimareimbi ai yifi sihehi rihündeimbi honguambeahindi hu ahamboso tükümeñiyu. <sup>3</sup>Nindou ranai ana yifi sihehi rihündeimbi honguambe-ani apu arandi. Ranane ñgiri ahambo seninambo amboani yiriwari hüputüpu-ndürindümo. <sup>4</sup>Nindou ranahambo afindimbo seninambo yiriwari hüputüpurü-horimindei marihündi, ñga sen ra gurihaimarandi. Ai ñginindi hamindi-wambo nindou ñgorü ai-amboani moai ahambo kikihirümündu. <sup>5</sup>Nimbokoani asu sirühi nindou ranai yifi sihehi rihündeimbi nimoei-ambe asu hifi wafu ranambe hoahoanggura-marandi. <sup>6</sup>Sisas ai hapoadümbo anguni huambe nindou-mayu ranai hoeiriri haya piñiyu hu ahandi wagabe yiri yimbu pusire mamaru. <sup>7</sup>Nindou ranai puküna hoafi karihoehü yahuya, “Sisas, se-ana God Nimoamo Hondü ahandi nimori anafi, se wambo nini nünüñgu-fendirimboyafa? Ro sihambo düduariheanini, Se Godimbo dabarindafoandühi ñgiri sihambo nini-moatükuni randiheandi mbisafi,” mehu. <sup>8</sup>Ramehu ra sapo Sisas ai hoafiyuhiya, “Moaruwai nendi se nindou ranahandi fiambeahindi kosifoao,” mehu ranimboyo. <sup>9</sup>Asu Sisas ai düdureandühi yahuya, “Sihafi ndüri nine?” mehuamboyo. Asu moaruwai nendi ranai yahoya, “Wandi ndüri ana amiane. Sapo ro ana afindi sirihünd-aneñi,” meho. <sup>10</sup>Moaruwai nendi ranai rani hifihündi yowani yihoefimbo hefoefemuni-poani yaho haya Sisasimbo hüti hoafimariri. <sup>11</sup>Rani fikimi hifi wafuambe moatei afindi ranai sesi sahüsühi buriyei wakimarihindi. <sup>12</sup>Raniyo moaruwai nendi ranai Sisasimbo hüti hoafiyehi seiya, “Se yihoefimbo koandi-hawamuna moatei akimi nda buraye ahei fiambendahumboane,” masei. <sup>13</sup>Raniyo Sisas ai hiniñgi-mareandüra rasüngumehindi. Moaruwai nendi ranai nindoundi fiambeahindi kosifoehi hehi moatei akimi burimaye ahei fiambemehindi. Raniyo 2,000 moatei ranai hiripini piñiyehi hehi gügürüyei hanimbo kurihoeambe hoe karihüsü hehi yifisafi-maye. <sup>14</sup>Nindou moatei hifandimarundi ranai fefou houmbo homo adükari ñgoafiyo asu akidou ñgoafi adaburo raniyo ra wataporimbomarundi. Raniyo ranühündambo nimorehi nindowenihi ranai nine-moatükuniyo moateimbo tükümeñeyo ra hoeifembo mahei. <sup>15</sup>Ai hei Sisasimboso

tüküiyahi hoeirihindane nindou horombo ahandi fiambe moaruwai nendi afindi nimareimbi-mayu ranahambo hoeimarihori. Ai asukai aboedi hohoanimo fifire hohoanimo yuhumbo hoeari güde haya mamaruwa hoeirihori hehi yihimbomarihori. <sup>16</sup>Nine-moatükuni Sisas ramareandi hoeifembo mahei ranai asukai hihiriyahi hei nindou horombo moaruwai nendi nimareimbi-mayu asu moatei ranahambo amboani wataporimbo-marihündi. <sup>17</sup>Raniyo nimorehi nindowenihi ranai rani hoafi ra himboriyei hehi Sisasimbo rani hifihündi ngörü-goanini hombo hüti hoafimarihori. <sup>18</sup>Asu Sisas ai botambe mafarifyuwamboyo nindou horombo moaruwai nendi nimareia hefoareandeimbimayu ranai aidibo hombo hüti hoafimayu. <sup>19</sup>Ŋga asu Sisas ai ahambo moai yini yahundo. Ai hoafiyundowohü yahuya, “Se sihafi worinambo ngafi fikiminindimbo Adükari ai sihafi fimbo hipoambo-reaninühi ramareanini ranahambo wataporimbondandi,” mehu. <sup>20</sup>Raniyo nindou ranai hu Dekaporis hifihü ahandi fimbo wataporimbo-maranda nimorehi nindowenihi afindi ranai mahepünahindi.

**Sisas ai nimorehi nimori yifihündi botire asu nimorehi  
angünümbi aboedimareandi  
(Matyu 9:18-26; Ruk 8:40-56)**

<sup>21</sup>Sisas ai Gariri kurihoe ra botambe farifi haya ngörü goanini huane nindou afindi ranai ahandi hoafi himborimbo mafandeandi. <sup>22</sup>Raniyo Suda-yei rotu wori hifandira randeimbi, ahandi ndüri Sairus, ai mahu. Ai hu Sisasimbo hoeirirühi ahandi yirikimi yiri yimbu pusire mamaru. <sup>23</sup>Ai Sisasimbo hüti hoafiyundo hoanguhü yahuya, “Wandi nimorehi nimori ai yifimbo yangirane, nga se didifi wari nandowandani animbo aboedimbeyo-wamboane,” mehundo-amboyu. <sup>24</sup>Asu Sisas ai aidibo mahua nimorehi nindowenihi afindi ranai ahandi süngu mahei. Raniyo ahandi fikimi gugureandühi ninendi-marihori. <sup>25</sup>Asu nindou gugurimareandi ranambe nimorehi mami 12 himbanühi-feimbimbo amoamo watikoafira-marandi. <sup>26</sup>Raniyo nimorehi ranai dokta hoeifepurimbo ahambo fehefembo-hünda ahandi kaki afindi saimarandi. Asu dokta ranai moai ahambo farihoemondani aboedi tüküfeyo, nga wani. <sup>27</sup>Nimorehi ranai Sisasindi hoafi ra himboriyo haya ho nindou afindi ranahei mbusümo maninggo. Raniyo ai Sisasindi daboadani ho ahandi hoandari hoeari ra sündimareandi. <sup>28</sup>Ai ahandihoari yare hohoanimo-yowohü yahoya, “Ro ahandi hoeari yangiri amboani sündariheandi ra aboedindamboyahi,” meho. <sup>29</sup>Ramare-andamboyo nimehünou amoamo watikoafimarandi-mayo ra kikiramindühi asu ahandi fiambe angüni ranai aboedimayoa fifirimareandi. <sup>30</sup>Asu Sisas ai ahandi fiambeahindi nginindi makosifoenda fifire haya hihirifi düdurearühi yahuya, “Düdi wandi hoearühi sündimareanda?” mehu.

<sup>31</sup>Ahambo süngururü-rundeimbi ai hoafiyomondühi yahomoya, “Nindou afindi engoro ra hoeiarowandane asu düdi sündimareandi safi hawambo düduwefoanda?” mehomu. <sup>32</sup>Ŋga awi Sisas ai düdi ahandi hoeari fihii sündimareandi ra fifirindihea yahu haya kokomara hu. <sup>33</sup>Nimorehi ranai ahambo rani-moatükuni tüküme feyo ra fifire haya yihimboyohü hihamindari-mayo. Raniyo ho Sisasindi yirikimi yimindhona nimarimbo muŋguambo moatükuni ahambo tüküme feyo ra wataporimbomarandi. <sup>34</sup>Sisas ai nimorehi ranahambo hoafiyundowohü yahuya, “Nimori akidou, se anihondumbo-arowandi ranimbohünda seana asüka aboedanafi. Sihafi aŋgüni aboedime feyo ranimbohünda se ŋgusüfo afurindo künde hawa ŋgafi,” mehu. <sup>35</sup>Sisas ai wataporimborandühi nüŋguambe nindou bidifiri ai Suda-yafe rotu hifandi randeimbindi worambeahindi sinimo hoafiyomondühi yahomoya, “Sihafi nimorehi nimori yifimayo. Ŋga nindou yamunde randeimbimbo tiŋirifo segodopoani,” mehomu. <sup>36</sup>Asu Sisas ai moai ahamundi hoafi ranahambo hihimboriyu. Ai Suda-yafe rotu hifandirandeimbi ranahambo yahundoya, “Yowani, yihimbo-yopoani, ŋga se moani Godimbo anihondumbo-ndowandi,” mehu. <sup>37</sup>Sisas ai nindou ranaheimbo ai-babidimbo hombo yowani yahu hiniŋgirerü haya, Pita, Sems, Son, asu ahandi akidi Sems ahamumbo yangiri süngureapuri haya mahu. <sup>38</sup>Ai homo Suda-yafe rotu bogorindi worikimi tüküyafundühi Sisas ai hoeireandane arani hoafi afindi afindi-mayei. <sup>39</sup>Ai worambe farifi hafu hoafiyundürühi yahuya, “Nimboe se arani hoafi afindi-afindayeia? Nimori ndanana yifiyopoani, ŋga moani apomboane,” mehuamboyei. <sup>40</sup>Asu nindou ranai ahambo tikifinambo-marihori. Ai aheimbo rani worambeahindi hihaifoarearü mbura, nimori ranahandi hondafindiyafe asu ahandi süngururü-rundeimbimemo aheimbo yangiri semündündüri haya, nimori yifi meŋgoro rani wori safani kamefoehindi. <sup>41</sup>Ai hüfu nimori ranahandi watiŋarihü kikihiramüdi haya hoafiyundowohü yahuya, “Tarita kumi,” mehu. Hoafi ranahandi nimindi ana ndahuraiane, “Nimorehi nimori yihoarifi ro hoafehanini, se botiyafo,” yaho ranane. <sup>42</sup>Asu nimehünou nimorehi nimori ranai botife haya mahowa nindou ranai mahepünehindi. Nimori ranana 12 himbani yoweimbiyo. <sup>43</sup>Sisas ai hoafiyundürühi yahuya, “Se yowani nindou mamimbo amboani ndani moatükuni nda hoafiyopoani. Nimori ranahambo sesi sahüdo animbo mbiseso,” mehu.

### Nasareti hündi ai Sisasimbo yi boarukomarihori

(Matyu 13:53-58; Ruk 4:16-30)

**6** <sup>1</sup>Sisas ai ranühi hiniŋgire haya ahandi ŋgoafi hondünambo mahua asu ahambo süngururü-rundeimbi ai ai-babidimbo mahomo. <sup>2</sup>Raniyo moani nimarimbo sihi Suda-yafe rotu worambe kefuai hüfu nimorehi nindowenihimbo yamundimareandüri. Nindou afindi ranai

himboryei hehi hepünahindühi seiya, “Ndani ndofe fifirife nda nahünda semündümboyua? Asu hepünifeimbi moatükuni refembo nginindi ra nahündambo semündümboyua? <sup>3</sup> Aiana worimbora randeimbi nindou yanggir-ani. Asu ai Mariandi nimori Sems, Sosep, Sudas asu Saimon ahamundi amonngo-ani. Asu ahandi rehimami ai nda sihiri babidi animboei,” sei hehi Sisasimbo ngusüfoambe yiboaruko-marihori. <sup>4</sup> Asu Sisas ai hoafiyundürühi yahuya, “Godindi hoafi hoafiyu-randeimbi ai munguambo ngoafihü ndürimb-ani. Nga ahandi ngoafi hondühi ahandi fikiminindi-so worambe ana ndürikoate-ani,” mehu. <sup>5</sup> Asu Sisas ai ranühi moai hepünifeimbi moatükuni rareandi, nga yimumami angünümbi nindou yanggiriyo wari manandeanda aboedimehindi. <sup>6</sup> Raniyo nindou ahambo anihondümbofe-koatemayeia hepünimefiyu.

**Sisas ai ahambo sünggururü-rundeimbi nindou 12 ranahamumbo koamarihepura mahomo**  
(*Matyu 10:5-15; Ruk 9:1-6*)

Raniyo Sisas ai ranühi ngoafi adaburo ra hoahoanguhü Godindi hoafi yamundi-mareandüri. <sup>7</sup> Ai ahambo sünggururü-rundeimbi 12 ahamumbo nindouyei fiambeahindi moaruwai nendi hefoefembo nginindi sagapuri mbura yimbu-yimbure koamarihepuri. <sup>8</sup> Sisas ai yare hoafiyupurühi yahuya, “Se ngomondühi ra nini-moatükuni ndowandümboemo, nga nimirimi yanggiri animbo ndowandümo. Se yowani bret, arü asu kaki rani-moatükuni sandife semindi-poani. <sup>9</sup> Se su güdundi, nga hoeari ana güdarundi rani yanggiri animbo güdu ndowandümo ngomo. <sup>10</sup> Asu se homo ngorü ngoafihü tüküyafu houmbo ngorü worambe ahafomo ra rani worambe yanggiri nimandimo mbundumbo ngorü-goanini asükai ngomo. <sup>11</sup> Ngomondani rani ngoafihündi ranai sihamumbo worinifepuri-koatendeihi sihamundi hoafi himbori-koatendeiani, se ngoafi ra hinngindundi. Se hombo mbisimombo ana, sihamundi tinarihündi hasüfi ra püpürüfiboadu houmbo ngomo ranaheimbo God ai moaruwaimbo-mbireandüri yaho nafuyondürimbo-hünda,” mehu. <sup>12</sup> Raniyo Sisasimbo sünggururü-rundeimbi ranai homo nimorehi nindowenihimbo hoafi bokarihoemondühi yahomoya, “Sihei ngusüfoambe moaruwai hohoanimo hinngindihindühi simbori hohoanimo süngundihindi,” mehomo <sup>13</sup> Asu ai homo nindouyei fiambeahindi moaruwai nendi hefoaru, angünümbi nindouyewami weri hoe karunda angünümbi nindou ai aboedi tüküyahi marihündi.

**Herot ai Sisasimboya Son hundürüra randeimbimbei mehu**  
(*Matyu 14:1-12; Ruk 3:19-20; 9:7-9*)

<sup>14</sup> Sisas ai mungu-moatükuni ramareandi hoafi ra adükari bogori Herot ai himborimayu, sapo ahambo munguambo nindou fifirihori hehimbo



wambo. Raniyo bidifiri nindou ai seiya, “Son hundüra randeimb-ani yifihündi botifi haya. Sapo ranimboane hepünifeimbi moatükuni yare arandi,” masei. <sup>15</sup>Asu bidifir nindou seiya, “Aiana Eraisa-ani,” masei. Asu bidifiri nindou seiya, “Aiana Godindi hoafi hoafiyomo rundeimbi horombo yifimemo nahurai-ani,” masei. <sup>16</sup>Herot ai rani hoafi ra himboriyu hayambo yahuya, “Ro Son hundürüra randeimbimbo ana horombo mbiro kikimarihehini. Ijga asu haponda asükaiyu yifihündi botifimboyu?” mehu. <sup>17-18</sup>Horombo Herot ai ahandi akidi Firipindi nimorehi Herodias masemündu. Ranimbo Son ai Herotimboya, “Aboedi hohoanimoyopoani sihafi akidandi nimorehi masowandifi,” yahundo-marandi. Ranimboyo Herot ai nindou bidifiri koamarihepura Sonimbo kikihirundümo mburumbo karabus-ambe hiningimarüwuri. <sup>19</sup>Herodias ai Sonimbo nginindiririhü hifokoefimbo hohoanimomayo, nga ai ngirindo. <sup>20</sup>Sapo Herot ai Sonimbo yihimborürühi-wambo. Ai fifireandi Son ai Godindi himboahü mbumundi nindou-mayua ranimbo Herot ai ahambo hifandüri-marandi. Ai Sonindi hoafi himboriyuhü ana, ngusüfoambe moaruwairirihü afindi hohoanimoyuhani. Ijga asu ahandi hoafi himborimbo hohoanimoyuhani. <sup>21</sup>Herodias ai Sonimbo mbiro kikifimbo, nafi kokorambo hoeimareandi. Herot ai ahambo hondi ai wakimarimindo rani sihi gafmani-yomondi bogori, ami-yomondi bogori asu Gariri hifandu-rundeimbi ahamumbo sesi sindimareandi. <sup>22</sup>Ai sowasümondühi nimarimondane, Herodiasindi nimorehi nimori ai hafo hihifi-hihifiyo wakimareandi. Raniyo Herot asu bidifiri boboagori sesi sowasümondühi mamarimo ai ranahambo afindi hihifi-hihifimemo. Raniyo adükari bogori Herot ai nimorehi nimori ranahambo düdureandühi yahuya, “Se nine-moatükunimboyo hohoanimoyafifi ra ndahananimboyahi, nga se wambo hoafiyafi,” mehu. <sup>23</sup>Herot ai dabarifi hoafiyundowohü yahuya, “Se nine-moatükunimboyo hoafayafi ana, ndahananimboyahi. Se hifi hifandarihandi ranahambo kikirowandiri asafi ana, ranamboani ro kikindiheanini-mboyahi,” mehu. <sup>24</sup>Nimorehi nimori ranai hondi sowana hihirife ho düdureandühi yahoya, “Nini-moatükunimbo düdumandahea?” mehoamboyo. Hondi ai yahoya, “Son hundürüra randeimbindi mbirombo animbo düdundafoandi,” mehondoamboyo. <sup>25</sup>Nimorehi nimori ranai hihirife ho adükari bogorimbo anahoya, “Hapondani hamindi Son hundürüra randeimbindi mbiro pretambe foando hawa ndawandiri,” meho. <sup>26</sup>Ai rani hoafi ra himboriyu haya ahambo ngusüfoambe moaruwai-maririsi, nga sapo nindou fandu masowasümo ahamundi himboahü nine-moatükuni se hoafayafi ro randiheamboya mehu. Ranimboyo ai nimorehi nimori ranahandi hoafi süngufembo ambe yahokoatemayu. <sup>27-28</sup>Raniyo adükari bogori ranai ami mami koamariheira Sonindi mbiro semindimbo mahüfu. Ai hüfu Sonimbo karabus worambe mbiro kikiriri mbura ahandi

mbiro ra pretambe foare semündü hu nimorehi nimori ranahambo masagado. Raniyo nimori ai semindi ho hondambo masagado. <sup>29</sup>Sonimbo sünggururü-rundeimbi ai rani hoafi himboriyomo houmbo homo karabus worambeahindi fi-nimoko sowandümo homo honḡguambe masihawuri.

**Sisas ai 5,000 nindoumbo sesi masagadüri**

*(Matyu 14:13-21; Ruk 9:1-17; Son 6:1-13)*

<sup>30</sup>Sisasindi hoafi sowandümo homo-rundeimbi ai homo ai-babidimbo mamühiyafundühi wataporimemo. Ai ratüpuri rarundühi nimorehi nindowenihimbo Godindi hoafi yamundimarundüri ranahambo. <sup>31</sup>Nindou afindi ranai fande bukürefoe-marandamboyo Sisas ai ahandi hoafi sowandümo homorundeimbi babidimbo sesi sesi-koatememo. Ranimboyo hoafiyupurühi yahuya, “Andai sibiripoanimbo nindou nimari-koateandühi nḡgefühi animbo akidou fi-handihu,” mehpuri. <sup>32</sup>Raniyomo ai yangiri botambe fareafu houmbo nindou nimari-koateandühi mahomo. <sup>33</sup>Ḳga nimorehi nindowenihimbo afindi ranai hoeirihi fifirihipuri, ranimboyo nindou afindi ranai Sisas ahandi sünggururü-rundeimbi babidimbo homboyomondani ahei nḡgoafi hiningirihi hehi Sisasimbo sowana pipina hei ai-boatei tükümehindi. <sup>34</sup>Raniyo Sisas ai ahambo sünggururü-rundeimbi babidimbo botambe homo tüküyafundane, nindou afindi ranai hifanda menḡoro. Raniyo hoeireanda mayoa sipsip hifandiyo-randeimbi nindou hifandiyo-koate nahurai fimayeia hipoambo-reandürühi afindi yamundimareandüri. <sup>35</sup>Asu sünggunambo nimbambe hüfihamindi ai hanuambe hoafiyomondühi yahomoya, “Ndanühi ana nindou nimari-koatereandühane ndeara hüfihamindi ahanu. <sup>36</sup>Ranimbo-hündambo animbo nimorehi nindowenihimbo ranaheimbo koarihawandüra hei nḡgoafi akimi adaburo ranühi aheihoari sesi pemiyei mbisahüsi,” mehomomo. <sup>37</sup>Ḳga asu Ai simbori hoafiyupurühi yahuya, “Se sesi dabudüri,” mehuamboemo. Ai simbori ahambo hoafiyomondühi yahomoya, “Awi se hohoanimoyafani ro afindi handret kinanambo aheimbo bret pemiyo saimboyo?” mehomomo. <sup>38</sup>Sisas ai düdureapurühi yahuya, “Nüngünümbi bretiyo se sihoemomboemo? Homo hoeiru,” mehuamboemo. Homo hoeirunda mayoambo yahomoya, “Hondahüfeimbi bret asu yimbu kini ranane enḡoro,” mehomondamboyo. <sup>39</sup>Sisas ai ahamumbo hoafimayua nindou ranaheimbo hoafimayomonda yibobo-yiboboyahi hehi mamarei. <sup>40</sup>Mamarei ra bidifiri 100, asu bidifiri 50, raniyei yibobo-yiboboyahi mamarei. <sup>41</sup>Sisas ai bret hondahüfeimbi asu kini yimbu ra semündü haya sünambe himboyo hafuhü Godimbo hihifirüri mbura, hifitire haya ahandi sünggururü-rundeimbi masagapuri nindou ranaheimbo yimbufembo. Asükaiyu kini akidou yimbu ranamboani hifitire haya yimbumareandi. <sup>42</sup>Munḡguambo nindou ranai sesi ra sahüsimbo simonḡgori-marihümündi. <sup>43</sup>Raniyo Sisasimbo sünggururü-rundeimbi ai

bret asu kini bidifiri bidifiri kurimayo ra 12 wambürambe wambürihiru hafombo tüküme feyo. <sup>44</sup>Nindou sesi masahüsi ranana 5,000-yei.

**Sisas ai kurihoe haᅅgifowami pütapimayu**

*(Matyu 14:22-33; Son 6:16-21)*

<sup>45</sup>Sisas ai nimehünou ahambo süᅅgururü-rundeimbimbo botambe farife hefe Gariri kurihoe behefe hefe ai-boatei Betsaida ᅅgoafinambo hombo hoafimayupuri. ᅅga aiana awi nimari mburimbo nindou ra koarihefendürimboyu. <sup>46</sup>Nimorehi nindowenihi ra koariheiri mbura asu ai Godimbo didibafifembo hifi wafuanambo mahafu.

<sup>47</sup>Rani nimbambe ahambo süᅅgururü-rundeimbi ai botambe Gariri kurihoe haᅅgifowamiyomo, ᅅga asu aiana ᅅgindaniyu. <sup>48</sup>Sisas ai ahambo süᅅgururü-rundeimbi hoeireapurane werambe bot ra ahamumbo kameihü ninendi-mareapura asu bot ra semindi hombo purina watiharimarundi. Raniyo Sisas ai si hoafimbo safi ahamumbo sowana bot ra ᅅgasünde haya hoe haᅅgifowami pütapimayu hu. <sup>49</sup>ᅅga asu ai hoeirüwurani hoe haᅅgifowami pütapimayua yifiaf-ani yahomo houmbo hasiheimemo. <sup>50</sup>Ai munguambo hoeirüwura mayoa yihimbo-mayomondamboyu, ai ahamumbo nimehünou hoafiyupurühi yahuya, “Se yihimbo-ndimboemo, ᅅga ᅅginindi nimandümo. Ndanana ro-anahi,” mehu. <sup>51</sup>Asu ai botambe farifi hafu ai-babidimbo mamaruwa hoeweri ranai afurimareanda mahepünafundi. <sup>52</sup>ᅅga Sisas ai hondahüfeimbi bret hepünifeimbi moatükuni ramareandi ra moai wudipoaporu fifirundi sapo ahamundi hohoanimo ranai tapihamiyohü wambo.

**Genesaretihü Sisas ai aᅅgünümbi nindou afindi aboedimareandi**

*(Matyu 14:34-36)*

<sup>53</sup>Raniyomo ai botambe kurihoe ra barihoemo gudiani Genesaret ᅅgoafikimi bot ra himondindümo hiniᅅgimarundi. <sup>54</sup>Ai botambeahindi makusifoendambo nindou ranai nimehünou fifirimarihori. <sup>55</sup>ᅅgoafi rani ᅅgoafikimi adaburo ranühi hahabodeihü hoafimayeiya, aᅅgünümbi nindou afindi safisendambe-rihindüri Sisas nüᅅguhi sahümündindüri hei marihündi. <sup>56</sup>Raniyo munguambo ᅅgoafi adaburo ranühi, nahi Sisas ai huani aᅅgünümbi nindou ra fufurihü-mündindüri hei fandihiri-rühündühi sihindüri marihündi. Raniyei ahandi wari hoandari ᅅgisihari hoeari ra aᅅgünümbi nendi ai sündimbirihindi sei hehi hüti hoafimaye. Asu ahandi hoeari sündimarihindi ranai asukai aboedi tükümehindi.

**God ai amoao mamiyei ahinümbi hohoanimo hifinambomareandi**

*(Matyu 15:1-9)*

**7** <sup>1</sup>Farisihündi bidifiri ai ahinümbi hohoanimo yamundurundeimbi nindou babidimbo Serusarem ᅅgoafihündi sifomo

Sisasimbo hoeimarüwuri. <sup>2</sup>Raniyo hoeirundani Sisasimbo süngururü-rundeimbimemo ranai wari popoaiakoate sesi sowasümondühi mamarimo. Wari popoaiakoate sesi sesimbo ranana moaruwaiane. <sup>3</sup>Sapo Farisi asu Suda-hündi aiana ai boagiri süngumarundi ranimboane ngiri wari popoaiakoate sesi dagüdi. <sup>4</sup>Asu sesi maket ambeahindi pememo amboani sesi popoaihefekoate ana, ngiri dowadümo. Sapo ai boagiri refemarandi süngumbo hipiri napo ra popoaindihou mbundumbo animbo mandu dowadumboemo. <sup>5</sup>Raniyo Farisi asu ahinümbi hohoanimo fifirundeimbi ai Sisasimbo hoafiyomondühi yahomoya, “Nimboe sihambo süngurunini rundeimbi ai boagiri ahini ra süngufe-koateayomoa? Asu nimboe wari afisaho kapeihi sesi asowasümoa?” mehomo. <sup>6</sup>Raniyu Sisas ai simbori hoafiyupurühi yahuya, “Godindi hoafi hoafiyurandeimbi Aisaia ana anihondumbo yimbu yafambeimbi sihamumboyu hoafimayu. Ai ndare sürü papirandühi yahuya,

‘Nindou ndanai ana yafambe yangirane wambo aboedani asei,  
nga ahei hohoanimoana angunane engoro.

<sup>7</sup>Aiana nindouyei ahinümbi hohoanimo ranane yamundihindühi  
Godindi hoafane nda asei,  
ranimboane ai wambo hohoanimoaye ra moanipoane,’

*Aisaia 29:13*

mehu. <sup>8</sup>Seana Godindi ahinümbi hohoanimo ra hiñgiriru houmboanemo nindouyei hohoanimo yangirane sünguarundi.” <sup>9</sup>Raniyo ai hoafiyupurühi yahuya, “Seana Godindi ahinümbi hohoanimo ranahambo ambeyaho hiniñgifehümbi sihamundi hohoanimo süngufembo yangirane hohoanimoemo. <sup>10</sup>Sapo Moses yahuya, ‘Se sihafi meapeyafe hoarehindafi,’ asu ‘Düdi ahandi hondamboyu afindamboyu moaruwai hoafayu ana, yifimbiyuwamboane,’ mehu. <sup>11-12</sup>Ŋga se ndaru hoafiyomondühiya, ‘Nindou ranai ahandi hondafindambo fehefe kaki napoeimbanisi, nga hondafindambo hoafindupirühiya, “Ndani kaki ana ro Godimbo saimbo masiheheandane,” mbüsu ana, asu ngiri nindou ranai kaki ranambo ahandi hondafindambo fehefepirimbo yini mbisimo,’ yahomo arundi. <sup>13</sup>Ranimboane Godindi hoafi ra hiniñgirundühi asu se boagiri-yafe hoafi ra süngu-arundi asu se afindi moatükuni rahurai raru arundi,” mehu.

**Nine-moatükuni nindumbo rareanda nindou ai moaruwai  
hohoanimoyei arihündi  
(Matyu 15:1-9)**

<sup>14</sup>Sisas ai nindou afindi ranaheimbo asukai miñgiyu hürühendüri haya hoafiyundürühi yahuya, “Muñguambo nindou se wandi hoafi nda himborindei hehi fifirindihindi. <sup>15-16</sup>Nine-moatükuni moanambühündi nindou fiambe ahano ai-ana ngiri nindumbo randerani moaruwai

hohoanimondu. Iŋga nine-moatükuniyo nindouyei fiambeahindi nimari haya moanambühi tükefeyo ranane rareandani nindou ai moaruwai hohoanimoayei,” mehu. <sup>17</sup>Sisas ai nindou ranaheimbo hiniŋgireandüri haya worina hafuane ahambo süngururü-rundeimbi ai rani kafeefe hoafi ranahambo düdumefundi. <sup>18</sup>Raniyo Sisas ai hoafiyupurühi yahuya, “Awi seana ŋgusüfokoate-wamboemo. Awi se moai fifirundiyo, sapo nine-moatükuni moanambühündi nindou fiambe ahano raniyopoani nindumbo moaruwaimbore arandi. <sup>19</sup>Ranana ŋgusüfoambe hohoanimo ranambe howohüyopoani, ŋga ranana bodoambe hani mburambo awaimboreandühane.” Sapo Sisas ai ramehu ra muŋguambo mamikarambo sesi ra Godindi himboahü ana aboedane yahumboyu. <sup>20</sup>Asu asükaiyu Sisas ai hoafiyuhi yahuya, “Nine-hohoanimo nindou ahandi fiambeahindi nimarihaya tükefeyo ranane nindou ranahambo Godindi himboahü moaruwaimboareri. <sup>21-22</sup>Ro hoafimayahi ranana ndani-moatükuni nindou hohoanimoambe tüküfe arandi ndanimboyahi hoafimayahi. Muŋguambo mamikarambo moaruwai hohoanimo, hübuhüni, nimorehi sisihomo asu anamindihoandi birabiri, nindou hifokoeffe, nimorehi anamindeimbi dibomboyo, hohoanŋi, wosihofori hoafi, bodimondambo ŋginindi, moaruwai hoafi, hoafi himborikoate, afindi-afindi, asu mamikari hohoanimo ranimboyahi hoafimayahi. <sup>23</sup>Muŋguambo ndani moatükuni ndanane nindou hohoanimo-ambeahindi tüküfeyoahü nindumbo rareirani Godindi himboahü moaruwaimboreri arandi,” mehu.

**Fonisia hifihündi nimorehi ai Sisasimbo anihondümbomareri**  
(*Matyu 15:21-28*)

<sup>24</sup>Sisas ai ranühündambo botifi haya Tair ŋgoafikimi mahu. Nindou ai ahambo fifirindihorimboyei yahuhaya worambe mamaru. Iŋga ai ŋgiri dibo amaru ra dibondifiyu. <sup>25</sup>Nimorehi mami ahandi nimorehi nimorindi fi-ambe moaruwai nendi nimariweimbi ai Sisas ranühi amaru hoafi ra himborimayo. Raniyo ai nimehünou ho Sisasimbo-so tüküfe ahandi yirikimi peyo mamaro. <sup>26</sup>Nimorehi ranai ana ai-poanimbo Fonisia sirihündi Grik hoafeimbiyo. Raniyo ai Sisasimbo ahandi nimorehi nimorindi fi-ambeahindi moaruwai nendi hefoefembohünda hütihütimariri. <sup>27</sup>Sisas ai nimoreh ranahambo kafeefe hoafi hoafiyundowohü yahuya, “Sihiri nimori ranaheimbo sesiboatei ndahundüri mbundühumbo animbo. Iŋga awi sihiri nimoriyei-mayo sesi ra yaforimbo ndahundürümboyefi,” mehuamboyo. <sup>28</sup>Asu nimorehi ranai hoafiyowohü yahoya, “Adükari, yinisi, ŋga yafori amboani sesifondi koambe nimboeimbo nimoriyei-mayo sesi bidifiri-bidifiri ra sahusihanei,” mehowamboyo. <sup>29</sup>Asu Sisas ai hoafiyundowohü yahuya, “Se hoafimayafi ranimbohünda ŋgafi, ŋga moaruwai nendi ai sihafi

nimori ra hiniŋgimareandi,” mehu. <sup>30</sup>Nimorehi ranai hihirife ho worambe himboyowane, ahandi nimorindi fiambeahindi moaruwai nendi ai kosifoendühi asu fondiwami mapo.

**Sisas ai nindou mami yafambe asu himboambe  
moaruwaimbü aboedimariri**

<sup>31</sup>Raniyo Sisas ai Tair hiniŋgire haya hu Saidonihü tüküfi mbura hu Dekaporisihü tüküfi haya hu Gariri kurihoe-kimi tükümeŋfiyu. <sup>32</sup>Sisas ai ranühi nimaruumbe nindou bidifiri ai nindou mami himbotühifo asu hihindi hoafiŋy randeimbi sahorimindei mahei. Raniyei ai Sisasimbo nindou ranahandiŋwami wari mbinandeandi sei hehi hüti hoafimaye. <sup>33</sup>Raniyo nindou ranahambo nindou afindi ahei mbusümo ahambo yaŋgiri serümündü mahu. Raniyo Sisas ai waribatendi himboambe yimbufihi pamareanda aboedimayafea asu wari boatendifihü ŋguri pare mbura nindou ranahandi teifühi pamareandi. <sup>34</sup>Sisas ai sünambe himboyu hafu haŋafu afindi hüfoareandühi nindou ranahambo yahundoya, “Efat.” Hoafi ranahandi nimindi ra ndahuraiane, ‘sübüdühoeŋi’ yahoane. <sup>35</sup>Raniyo nimehünou ahandi himboambe ai aboediyowohü asu hoafi hihindi hoafiŋyumarandi ra asükai aboedi hoafimayu. <sup>36</sup>Asu Sisas ai nindou ranaheimbo rani-moatükuni hoeimarihindi ranahambo nindou ŋgorümbo yowani hoafiŋyopoani mehu. Ai aheimbo yowani mehündüriyosi, ŋga asu ai ranahambo wataporimbomarühü hei. <sup>37</sup>Ai hepühendühü seiya, “Sisas ai muŋgu-moatükuni aboedi ramareandi. Ai rareandani himbo tühifo güreyandüreimbi amboani ai himboriyei asu hoafikoateyeimbi ai-amboani wataporiyei marihündi,” masei.

**Sisas ai 4,000 nindumbo sesi masagadüri  
(Matyu 15:32-39)**

**8** <sup>1</sup>Asu ŋgorüsümboani nindou afindi ranai Sisasimbo sowahi mafandihindi raniyei sesikoatemaye. Raniyo asu Sisas ai ahandi süngururü-rundeimbimbo mborai yahupuri haya hoafiŋyupurühi yahuya, <sup>2</sup>“Ro nindou ndanaheimbo hipoamboarihearü. Ai ro-babidi ŋgimi si nimareimbo wambo asu ai sesikoateanei. <sup>3</sup>Ro ŋgiri wembopo ŋgoafinambo koandihhearü, ŋga ai nafini himboa wuwurindei hehi pindeimboyei. Iŋga asu bidifiri ana nafi aŋgunipoedanei,” mehu. <sup>4</sup>Asu Sisasimbo süngururü-rundeimbi ai simbori hoafiŋyomondühi yahomoya, “Sihiri ana ŋgoafi aŋgunaneŋi. Iŋga asu dagüdambo bret ra ndahumindifi hohumbo nindou ndanaheimbo mandahundüra?” mehomo. <sup>5</sup>Raniyu asu Sisas ai düdureapurühi yahuya, “Se nüŋgunümbi breŋiyo sowandümomboemoa?” mehuamboemo. Asu ai hoafiŋyomondühi yahomoya, “Ro 7 bret sihehumboaneŋi,” mehomondamboyu. <sup>6</sup>Raniyo

asu Sisas ai bret 7 ra semündü haya Godimbo hififimarüri. Raniyo asu hifitire mburambo ahambo süngururü-rundeimbimbo bidifiri bidifiri ra yimbumareapuri. Asu ahamumbo hoafiyupurühi yahuya, “Se bret ra nindou ranaheimbo yimbundundüri,” mehupuri. Raniyo asu ahambo süngururü-rundeimbi ai rasüngu-marundi. <sup>7</sup>Asu süngururü-rundeimbi ai kini yahunümbi amboani sowapundümo. Sisas ai kini ranahambo Godimbo hihifirüri mburambo asu ahandi süngururü-rundeimbimbo hoafimayupurambo kini ra nindou ranaheimbo yimbumarundüri. <sup>8</sup>Asu munguambo nindou ai sesi ra sahüsi bodomaye. Raniyo asu bidifiri-bidifiri sesimayo ra 7 wambüri wambürihimarundi. <sup>9</sup>Asu 4,000 nindouyei sesi ra masahüsi raniyo asu Sisas ai hoafimayundürambo bukürimayahindi. <sup>10</sup>Asu Sisas ai ahambo süngururü-rundeimbi babidi botambe fariyafu houmbo Darmanuta hifinambo mahomo.

### **Farisi ai Sisasimbo sisihimoruri hoeimarüwuri**

<sup>11</sup>Farisi ai Sisasimbo sisihimofi hoeifimbohünda tüküyafu düdumarüwuri. Raniyo asu Sisasimbo düdurüwurühi yahomoya, “Se Godindi nimorayafi ana, se Godindimayo hepünifeimbi moatükuni randiwandi,” mehomo. <sup>12</sup>Asu Sisas ai ngusüfoambe moaruwairirihü raguambe yare hoafiyuhi yahuya, “Nindou nda nimboe hepünifeimbi moatükuni hoeifembo düduhindi? Ro anihondümboanahi hoafehandüri, ngiri nafuimbo moatükuni yahurai hoeindihindi,” mehu. <sup>13</sup>Raniyo asu Sisas ai Farisimbo yare hiningireapuri hayambo ndamefiyu. Asu botambe farifi haya kurihoe barihoei gogoanini mahu.

### **Farisi asu Herot ahamundi yis ranahambo kafeefe hoafi**

<sup>14</sup>Sisasimbo süngururü-rundeimbi ai bret adükari semindi hifombo mitanimarundümo. Ijga asu mami yangiriruri botambe foarüwuri houmbo sowarindümo mahifomo. <sup>15</sup>Asu Sisas ai ahini hoafiyupurühi yahuya, “Se Farisi-yomondi asu Herotindi yis ranahambo hibadumbo!” mehu. <sup>16</sup>Ijga asu Sisasimbo süngururü-rundeimbi ai hoafi ranahandi nimindi ranahambo wataporimbomarundi. Ai yaru hoafiyomondühi yahomoya, “Sapo ai hoafimayu ra bretkoateyefi ranahamboyu hoafimayu,” mehomo. <sup>17</sup>Raniyo asu Sisas ai fifireandi nini-moatükunimboemo wataporimbomarundi ranahambo. Asu Sisas ai düdureapurühi yahuya, “Se ra nimboe bretkoateyefi ranahambo wataporimboaru hoangomoa? Awi seana moai hoeirundi asu fifirundi? <sup>18</sup>Awi se himboarümbü-anemosi, nga moai hoeirundi asu se himboambembü anemosi, nga moai himboriyomo. Sihiri horombo bretkoateyefühi horombo ro ramarihendi ra se fifirundai? <sup>19</sup>Horombo ro hondahüfeimbi bret 5,000 nindoumbo maseheandi rani-simboani se nüngunimbi bidifiri bidifiri bret wambüriyo wambürihimarundi?” Raniyomo asu ai hoafiyomondühi yahomoya,

“12 wambüri,” mehomondo. <sup>20</sup>“Asu se fifiru ro bret 7 4,000 nindoumbo maseheandi ra. Asu nüngunümbi bidifiri bidifiri bret wambüriyo wambürihimarundi?” mehuamboyo. Asu ai hoafiyomondühi yahomoya, “7 wambüri,” mehomondo. <sup>21</sup>Asu ai yare hoafiyupurühi yahuya, “Awi se moai ra fifirundiyo?” mehu

**Betsaidahüdi himboatihari mami Sisas ai diboadomariri**

<sup>22</sup>Betsaida ngoafihü Sisas ai ahambo süngururü-rundeimbi babidimbo hifomo tüküyafundane asu ahambo sowana nindou himboatihari mami sowarindümo mahifomo. Raniyei ai Sisasimbo fambiheira seihehi hoafimayahüdo. <sup>23</sup>Raniyu Sisas ai himboatiharimbo warihü kifi hürümündi haya ngoafi hiniñgirine hena hafani ahandi himboarambe nguri pamariri. Ai kikihirümündühi düdufinduhi yahuya, “Se ngorümoatükuni amboani hoeiriwandai waniyo?” mehundo. <sup>24</sup>Asu nindou ranai himboapoyu wakirendühi yare hoafiyuhi yahuya, “Ro nindou bidifiri hoeiriheambo-anahi. Ijga asu ro hoeiriheandani nimi firibadihoai aho nahuraiane,” mehu. <sup>25</sup>Ijga Sisas ai asükaiyu ahandi himboarühi wari pamareandi. Asu ahandi himboari ra birimarihoayo. Raniyu asu himboari ahandi ra aboediyowohüyo asu münguambo moatükuni ra aboedi hoeimareandi. <sup>26</sup>Asu Sisas ai worinambo koariherühi yahuya, “Se yowani ngoafina ngamboyafi,” mehu.

**Pita ai Sisasimboya Krais-ani mehu**

*(Matyu 16:13-20; Ruk 9:18-21)*

<sup>27</sup>Ijga asu Sisas ai ahambo süngururü-rundeimbi babidi ngoafi Sisaria Firipai ngoafikimi adaburo ranühi mahomo. Raniyomo asu nafinambo homondühi ahambo süngururü-rundeimbimbo düdureapurühi yahuya, “Wambo didai-ani mbaseia?” <sup>28</sup>Asu ai hoafiyomondowohü yahomondoya, “Bidifiri ai hoafiyeihüya, ‘Aiana Son hundürürandüri-randeimb-ani.’ Asu bidifiri ai hoafiyeihü ‘Aiana Eraisa-ani.’ Ijga asu bidifiri ai hoafiyeihü, ‘Aiana Godindi hoafi hoafiyurandeimb-ani,’ masei,” mehomo. <sup>29</sup>Asu Sisas ai düdufipurühi yahuya, “Asu se wambo nünguru hohoanimoyomo ro didiyaha?” Ijga asu Pita ai simbori hoafiyundühi yahundoya, “Seana Krais-anafi, nindou God ai diboniyunini hiniñgimareanini nindou aboedambo-fendürimbohünda,” mehu. <sup>30</sup>Asu Sisas ai hoafiyupurühi yahuya, “Se yowani nindou ngorümbo hoafindimboemo ro nindou nüngunahurayahi ranahambo,” mehu.

**Sisas ai ahandi asübusi afindi semindühi yifimbo hoafimayu**

*(Matyu 16:21-28; Ruk 9:22-27)*

<sup>31</sup>Asu Sisas ai ahambo süngururü-rundeimbimbo yamundeapurühi yahuya, “Nindou Hondü aiana asübusi afindi ndemündümbui.



Asu ahambo ana bogori nindoumemo, Godimbo sihou-rundeimbi bogorimemo, ahinümbi fifirundeimbimemo ai ahambo yiboarukondüwurühi hifokoandüwurimboemosi, nga ngimi sindu haya asikai botindifimbui.”<sup>32</sup> Asu Sisas ai hoafi ra fifirifoare hoafimayupuri. Raniyu asu Pita ai Sisasimbo serümündü himborani hu nginindühire hoafimarüri.<sup>33</sup> Asu raniyu Sisas ai hihirifi ahambo süngururü-rundeimbimbo hoeireapurühi asu Pitambo nginindühire hoafiyundowohü yahuya, “Satan, andai se biyafu. Nga seana Godindi hohoanimo-yopoani sünguarowandi, nga nindouyafe hohoanimo anandi sünguarowandi,” mehu.<sup>34</sup> Asu Sisas ai nimorehi nindowenihi aheimbo ahandi süngururü-rundeimbi babidimbo mborai yahundüri haya hümarihendüri. Ai hoafiyundürühi yahuya, “Nindou düdi ai wambo süngufendirimbo hohoanimoayu ana, ai nindou mami ahandi nimi keimbi karihendeimbi semindi ho yahurai ahandi yifiri ra hiniñginde haya asu wambo süngumbirandiramboane.<sup>35</sup> Nindou düdi ai ahandihoari ahandi yanggiri ra kikiharamüdu ana, ahandi yanggiri ra awarindihoemboe. Asu nindou düdi ai aboedi hoafi asu wambohünda ahandi yanggiri ra hiniñgareandi ana, ai yanggiri gedühi nüñgumbui.<sup>36</sup> Asu nindou düdi ai muñgua hifi ndanihünda moatükuni ra asemüdu ana, asu ahandi yanggiri niñgombo ra awarindihoembui asu muñguambo moatükuni ranai ngiri fandiheri.<sup>37</sup> Nga asu nindou ranai nini takini madagado yanggiri ra simbori sisefembo-hündambo? <sup>38</sup> Asu nimorehi nindowenihi hapondanambe burayei ai Godimbo hiniñgirihorühi wosihoafori hohoanimoyei arihündi. Nga nindou düdiyei ai wambo asu wandi hoafi ranahambo amoaniñg-arihündiri ana, asu ro wandi Apendimayo himboamupui-randeimbi asu sürühoeimbi sünambeahindi nendi babidi kosefi simboani ro aheimbo amboani amoaniñgi-ndihandürimboyahi,” mehu.

**9** <sup>1</sup> Asu Sisas ai hoafiyundürühi yahuya, “Ro siheimbo anihondümbu-anahi hoafehandüri, nindou haponda burayei ndanai yifikateyei-ambe animbo God nginindi hifandarandi ra nginindeimbi kodowani hoeindihimboyei,” mehu.

### Sisasindi fi ranipoanimbo tüküme feyo

(*Matyu 17:1-3; Ruk 9:28-36*)

<sup>2</sup> Asu 6 si hoane Sisas ai Pita, Sems asu Son sepurimündü haya hifi wafu nimoamo raniwami mahafomo. Ranühi ai-yanggiri niñgomombo Sisasimbo hoeirüwurane ahandi fi ranai ranipoanimbo tüküme feyo.  
<sup>3</sup> Raniyo asu Sisasindi hoeari ranai kifohi hamindimayo. Nga hifi ndanihündambo nindou ai ngiri randeandani kifohi yahurai tükündefeyo.  
<sup>4</sup> Raniyo Eraisa asu Moses ai ranühi ahamumbo-so tüküyafine Sisas babidi wataporiyomondühi maningomo.  
<sup>5</sup> Pita ai rani moatükuni ra hoeire haya hoafiyuhi yahuya, “Yamundo-randeimbi, ndanühi animboefi

ranamboani aboedanesi. Iᅇga dago ᅇgimi hüründihumboane, sihambo mami, Mosesimbo mami asu Eraisambo mami,” mehu. <sup>6</sup>Asu Pita ai moai nini-hoafi hoafimbo hohoanimoyu, sapo ᅇgorü yimbu babidimbo ai yihimboyomondühi-wambo. <sup>7</sup>Raniyo asu mburiᅇgai ai kosi muᅇguambo gabudimafoareapuri. Asu mburiᅇgai-ambeahindi hoafi mami ranai hoafiyohü yahoya, “Nimori nda wandi nimor-ani ro ᅇgusüfo pararihini, ᅇga se ahandi hoafi himborindomo,” meho. <sup>8</sup>Iᅇga Pita, Sems, Son ai himboapomemoyosi, ᅇga asu Sisas yaᅇgiri ai-babidimbo ranühi manüᅇgu. <sup>9</sup>Asukai hifi wafuwanipoedi hihiriyafu hanimondühi Sisas ai ahambo süᅇgururü-rundeimbimbo hoafiyupurühi yahuya, “Se yowani nini-hoafi hoafindimboemo nine-moatükuni hoeimarundi ranahambo. Iᅇga hibadu ᅇgomombo Nindou Hondü ai yifihündi botindifiyuan animbo nimorehi nindowenihi ranaheimbo hoafindimo,” mehupuri. <sup>10</sup>Asu Sisas hoafimayu ra hohoanimoyomo kikihirundühiyomo ahamundihoari simbori ndüwuriyafundühi yahomoya, “Sisas hoafimayu yifihündi botife ra ninea?” mehomo. <sup>11</sup>Asu Sisasimbo düdurüwurühi yahomoya, “Nimboe ahinümbi hohoanimoy fífirundeimbi ai hoafiyomondühiya, ‘Eraisa boatei animbo tükündifimbui,’ mehomo?” mehomondamboyu. <sup>12</sup>Sisas ai simbori hoafiyupurühi yahuya, “Aiana anihondumbo anahomo raru hoafeyomo, Eraisa boatei animbo tükündüfi muᅇguambo moatükuni ra diboadondeambui. Ra anihondanesi, ᅇga Godindi bukambe hoafi apeniᅇgo ranai yare hoafiyowohü yahoya, ‘Nindou Hondü ai asübusi afindi ndemünduani nindou afindi ai ahambo moani-ani mbiseimboyei?’ meho. <sup>13</sup>Ro siheimbo hoafehandüri, Eraisa ana tüküfimboani. Godindi bukambe hoafi yare meᅇgoro süᅇgu nindou aiana moaruwai hohoanimoy randihimboyei nine-moatükuni ai refembo hohoanimoye süᅇgu,” mehu.

**Sisas ai nimori moaruwai nendi nimareimbi aboedambomariri**

*(Matyu 17:14-21; Ruk 9:37-43)*

<sup>14</sup>Sisas ai, Pita, Sems asu Son babidimbo süᅇgururü-rundeimbi bidifiri sowanambo mahomo. Ai homo hoeirundane ahinümbi hohoanimoy fífirundeimbi ranai Sisasimbo süᅇgururü-rundeimbi bidifiri babidimbo hoafinambo simbori simbori-memondamboyo nindou afindi ranai ahamumbo wakire meᅇgoro. <sup>15</sup>Raniyei asu nindou afindi ranai Sisas hoeirihori hehimbo hepünehindühi ahambo hihifimbo pipimaye hei. <sup>16</sup>Sisas ai düdufipurühi yahuya, “Se ninimboemo ahinümbi hohoanimoy fífirundeimbi babidimbo hoafinambo simbori hoafimemoa?” mehupuri. <sup>17</sup>Ahei mbusümo nindou mami ai hoafiyuhi yahuya, “Yamundo-randeimbi, ro wandi nindowenihi nimori moaruwai nendi ai ahandi fiambe nimarimbo hoafikoateyu-marandambo sihambo sowanambo sahumindi asihühi. <sup>18</sup>Asu moaruwai nendi ranai

farifendowohü wakifoarerani hifini piyu yanggurimbo yahamonafi ngasiho wutipuiariyuhü yahafi hiheporiyu arandi. Asu ro sihafi sünguru rundeimbimbo moaruwai nendi ranahambo raguanambofembo düdumeheapuri, nga ai ngirindimo,” mehu. <sup>19</sup>Asu Sisas ai nindou ranaheimbo hoafiyundürühi yahuya, “Se ana moai anihondümborihindi. Ro nüngunimbimboyo sebadidi manimboaha? Asu ro nüngunimbimbo sihei tijirifo ra mandahamindiha? Nimori ra ndühi sahorimindei sühüsi,” mehündüri. <sup>20</sup>Asu ahambo süngururü-rundeimbi ai nimori ra sowaründümo Sisas sowana mahifomondamboyo moaruwai nendi ranai Sisas hoeirirühi nimori ranahambo wakimafoarera hifini piyu hihire amoahirerandühi yanggurimbo yahomonafi ngasiho wutipuiarimayu. <sup>21</sup>Sisas ai afindambo düdurirühi yahundoya, “Nimori nda nüngunimbimboyo ndahurai ramefiyuwa?” Asu afindi ai yahuya, “Akidouyuambe piyu hayamboani raraoyu arandi. <sup>22</sup>Muñguambo si moaruwai nendi ranai nimori ranahambo haiambe asu himoni wakifoareri arandi. Se nini-moatükuni refemboayafi ana, se hipoambondi wamunühi fandihawamuni,” mehu. <sup>23</sup>Asu Sisas ai afindambo hoafiyundühi yahuya, “Se nimboe hoafiyafühiya, refemboayafi ana, fandihawamuni masafa? Anihondümbore-reandeimbi nindoumbo ana muñguambo moatükuni ra tijümbüyopoani,” mehu. <sup>24</sup>Asu nimehünou afindi ai hihifi-hihifiyuhü hoafiyuhi yahuya, “Ro anihondümboriheambo-anahisi, nga se koe wambo fandihawandira anihondümbore-ndiheamboane,” mehu. <sup>25</sup>Asu Sisas ai hoeireandane nindou afindi ranai pipiyei hei wakimarioramboyo asu moaruwai nendi ranahambo hoafiyundowohü yahuya, “Moaruwai nendi, se nindou ndanahambo rariworani himbotühifoyu asu hoafikoateyu arandi. Se nindou ndanahandi fiambeahindi kodiboawandi, nga asu se asükai yowani farifembopoani,” mehundo. <sup>26</sup>Asu moaruwai nendi ranai heiyohüyo nimori ranahambo yabadirani hifini pimayuwa yare siheri hayambo makosifoendi. Asu nimori ranai yifi nahurai menguruwamboyei nindou afindi ranai yifiyumboani masei. <sup>27</sup>Iga asu Sisas ai nimori ranahambo warihü kifi botiriri hiniñgimarira manüñgu. <sup>28</sup>Asu Sisas ai ahambo süngururü-rundeimbi babidi hafomo worambe nimarimombo düduyafundühi yahomoya, “Nimboe ro moaruwai nendi ra raguanambofe-koatemayefa?” mehomondamboyo. <sup>29</sup>Asu Sisas ai simbori hoafiyupurühi yahuya, “Godimbo didibafifenambo animbo moaruwai nendi ndahurai ana raguanambofe-ndürimboane,” mehu.

**Sisas ai ahandi yifiyo hefembo botife ranahambo wataporimbomarandi**  
(*Matyu 17:22-23; Ruk 9:43-45*)

<sup>30</sup>Sisas ai ahambo süngururü-rundeimbi babidimbo rani ngoafi ra hiniñgiru houmbo Gariri hifi mbusümo mahomo. Ai ramefundi ra

nindou fifirindihimunimboyei yahomo houmbo didimoamboemo ranühi mahomo. <sup>31</sup>Sisas ai hoafiyupurühi yahupuriya, “Nindou Hondümbo ana hifokoefimbo-hünda nindouyei warihündihorimboyei. Ŋga aiana ŋgimi nimbundu hayambo asukai yifihündi botindifimbui,” mehupuri. <sup>32</sup>Asu ahambo süngururü-rundeimbi ai hoafi ranahandi nimindi ra moai fifirundi, ŋga ahambo düdufimbo yihimbomaruri.

**Düdi adükari hamindayua**  
(*Matyu 18:1-5; Ruk 9:46-48*)

<sup>33</sup>Sisas ai ahambo süngururü-rundeimbi babidi homo Kaperneam ŋgoafihü tüküyafu houmbo worinambo homo mafariyafundi. Raniyu asu ranühi nimarümbo hoafiyupurühi yahuya, “Nimboe se nafimbo simbori hoafimemo sinimoa?” mehupuri. <sup>34</sup>Ŋga asu moai ahambo süngururü-rundeimbi ai simbori hoafiyomondo sapo nafini simbori hoafimemo ra nindou düdi adükaryu yahomondühi wambo. <sup>35</sup>Sisas ai nimarümbo ahandi hoafi sowandümo homorundeimbimbo hoafimayupurambo mahomo. Ai hoafiyupurühi yahuya, “Nindou düdi adükari bogori nindou tüküfemboayu ana, ai ndürikoatendu haya munguambo nindouyei moani ratüpuriyu randeimbi-mbiyuwamboane,” mehu. <sup>36-37</sup>Sisas ai nimori akidou serümündü ahamundi mbusümo hiniŋgiriri warihü kikihirümündi nüngumbo yahuya, “Nindou düdi nimori akidou ndahuraimbo wandi sünguna afariheirü ana, ra wamboane afarihendiri. Ai wambo yanŋiriyopoani, ŋga nindou düdi wambo koamarihendira makosahi ahambo kapeihani,” mehu.

**Nindou sihefombo moaruwaifemunikoateyei ana, sihefi ŋgunindanei**  
(*Ruk 9:49-50*)

<sup>38</sup>Son ai hoafiyundohü yahuya, “Yamundo-randeimbi, ro hoeirihundani nindou mami sihafi ndürinambo moaruwai nendi hefoaremarandi. Raniyu asu ahambo yowani masahundo, nimboe ai sihefi sirambeahindiyupoani sefahumbo,” mehu <sup>39</sup>Sisas ai hoafiyuhi yahuya, “Se yowanayahondopoani. Nindou düdi ai hepünifeimbi moatükuni wandi ndürinambo rawareandi ana, ŋgiri wambo moaruwai hoafundiri. <sup>40</sup>Nindou düdi sihefimbo moaruwaimbo-femunikoateayu ana, ai sihefi ŋgunindani. <sup>41</sup>Ro anihondümbo-anahi hoafepuri. Nindou düdi ai hoeireaninani se Kraisindi-yafani sihambo hoe fuyamündi asaganini nindou ranai ahandi takini hondü ra süngunambo ndemündümbui,” mehu.

**Moaruwai hohoanimo ai anihondümbofe hifinambore arandi**  
(*Matyu 18:6-9; Ruk 17:1-2*)

<sup>42</sup>Sisas ai hoafiyuhi yahuya, “Nindou nimori akidou ai wambo anihondümboreandirani asu nindou ŋgorü ai rarirani moaruwai

hohoanimo sünguareandi ana, nindou ranahambo nimoei pefi hüputüpuimüdi mburumbo hoe hohoe afindambe safoefiyuwani yifimbiyuwamboane. <sup>43-44</sup>Sihafi watijari ai randeaninani moaruwai hohoanimondafühi ana, asu kandihawandi. Ijga wari ngörü karihoayowani fi bidifiri yanggiri koadürümbo niŋgombo ra aboedane. Ijga fi muŋguambo hai dikirifekoateyorandeimbi ranambe pifeninani hani ranana moaruwaiane. <sup>45-46</sup>Se sihafi tijari ai randeaninani moaruwai hohoanimondafühi ana, kandihawandi. Ijga tijari ngörü karihoayowani fi bidifiri yanggiri koadürümbo niŋgombo ra aboedane. Ijga fi muŋguambo hai dikirifekoateyo randeimbi ranambe pifininani hani ranana moaruwaiane. <sup>47</sup>Sihafi himboari ai randeaninani moaruwai hohoanimondafühi ana, hündihawandi. Ijga himboari mameimbi yanggiriyo hefe God ŋginindi hifandarandi ranambe kefoefe ra aboedane. Ijga himboari yimbuimbüyo hefe hai didirifekoate koadürümbo horoweimbi ranambe pifeninani hani ranana moaruwaiane. <sup>48</sup>Asu hai ranambe kimonggimo nindoumbo asahüsihündiri ranamboani ngiri yifisafindei. Asu hai ahei fi tikirarandüri ranamboani ngiri dikirindifeyo. <sup>49</sup>Muŋguambo nindou ranai ahei fi aboedifembohünda Godimbo sesi sihefembo nami paparihindi yahurai animbo hainambo tijirifo ndahümündimboyei. <sup>50</sup>Nami ana aboedi moatükun-anesi, nga asu nami ranai ahandi apari ra hiniŋgireandühi wanayo ana, budesowani aparikoateayo ra ahandi apari asukai ngiri koadürü koadüründife hiniŋgindifeyo. Ijga se nami aparayo nahurai aboedi hohoanimo süngundihindi sihei wandafi mamiyei mbusümo,” mehu.

### Nimorehi semindihüdi hiniŋgife hoafi

(Matyu 19:1-12; Ruk 16:18)

**10** <sup>1</sup>Sisas ai rani hifi ra hiniŋgire haya Sudia hifina Sodan hoe ngörü-goesürüni barihoei mahu. Ranühi nindou afindi ahandi süngu tümareandamboyu asu yamundimareandüri ai yaremarandi süngu. <sup>2</sup>Farisi nindou bidifiri ai Sisasimbo-so tüküyafu houmbo asu randihurani Sisas ai boaribadamüdi ngörü hoafi hoafimbiyuwambo yahomo houmbo raru hoeimarüwuri. Ai Sisasimbo düdurüwuruhi yahomoya, “Nindou mami ahandi nimorehi hiniŋgife meho ehu ana, asu sihefi ahinümbi hohoanimo ranahambo wanŋeimandiyo?” mehomo. <sup>3</sup>Asu Sisas ai simbori hoafiyupuruhi yahuya, “Moses ai nine-ahinümbi hohoanimo masagapura?” mehu. <sup>4</sup>Farisi ai hoafiyomondühi yahomoya, “Moses ai hoafiyuhi yahuya, ‘Nindou ai pepa fihü sürü pande dagadowohü koandihendani ndemindi haya ngomboe,’ mehu,” mehomo. <sup>5</sup>Sisas ai hoafiyupuruhi yahuya, “Moses ai hoafi sihamumbo masihendi ra Godüdi hoafi himbosihimo-rihoemondimbi memondamboyu hoafi ra masihendi. <sup>6</sup>Horombo hondü God ai muŋguambo moatükuni

nafirandühiyu nimorehi nindowenihi nafimarapiri. <sup>7</sup>Ranimayo-wamboane asu nindowenihi ai ahandi hondafindi hiniñgindeapiri haya nimorehühindifimbu. <sup>8</sup>Ranimbo asu yimbu ai mami fi tükündafineamboyafe. Asu nindou ra yimbuyafepoani, nga mamanafe. <sup>9</sup>God ai nindou yimbu ra mamambemareapirane, nga nindou didai ngiri yikürübüdeapiri,” mehu <sup>10</sup>Sünğunambo Sisas ai ahambo sünğururü-rundeimbi babidi worambe nimarimomboemo nimorehi semindhünda hiniñgifembo hoafi ranahambo düdumarüwuri. <sup>11</sup>Sisas ai hoafiyupurühi yahuya, “Nindou düdi ai ahandi nimorehi ra moei yahu haya hiniñgireandühi asu nimorehi ngorü asemüdu ana, ai ahandi weyangiruhüdi ranahambo moaruwaimboreandühi nimorehi sisihimoyuhani. <sup>12</sup>Asu nimorehi ai nindowenihi hiniñgiri haya ngorü nindowenihi aserimindo ana, ai-amboani nindowenihi birabiriyohane,” mehu.

**Sisas ai nimoakidoumbo God ai aboedi  
aboedimbireandüramboane mehu  
(Matyu 19:13-15; Ruk 18:15-17)**

<sup>13</sup>Nindou ai Sisas sowana nimoakidibou ra fufurihümüdi tükümehindi ai aheimbo wari nandifendürimbohünda. Nga asu sünğururü-rundeimbi ranai nindou ranaheimbo nginindimarandüri. <sup>14</sup>Asu Sisas ai ra hoeireanda mayoa, ahamumbo ngusüfoambe nimbimayupuri. Asu ai hoafiyuhi yahuya, “Nimoakidibou ra ndühi aheimbo hiniñgirundüra wambo sowana mbisihüsi. Nga ngiri bobohindundüri. Nga God nginindi hifandarandi ra nimoakidibou ndahuraiyeiane. <sup>15</sup>Ro anihondumbo-anahi hoafehandüri. Nindou düdi God nginindi hifandarandi ra nimori nahurai tüküfekoateayu ana, ai ngiri ranambe kebuai ngu,” mehu. <sup>16</sup>Asu Sisas ai nimoakidoumbo warihi kikihiramündündüri mbura aheimbo wari nandearühi God ai aboedi aboedimbireandüramboane mehu.

**Nindou napo afindeimbi  
(Matyu 19:16-30; Ruk 18:18-30)**

<sup>17</sup>Sisas ai botifi hayambo hüfuane asu nindou mami ranai pipiyu hu ahandi hañgifoani yimindohonambo mamaru. Raniyu asu ai düdufihi yahuya, “Yamundo-randeimbi Aboedi, ro ninüngundiheandühi yangiri koadürü koadürumbo manimboahi?” mehu. <sup>18</sup>Asu Sisas ai simbori hoafiyundühi yahundoya, “Nimboe se wambo aboedi asafindira? Moai nindou didi ai aboedi, nga God mami ai yangiri ani aboedayu. <sup>19</sup>Se ahinümbi hohoanimo nda fifirowandi: Se nindou hifokoeffepoani, se nimorehi sisihimopoani, se hümbuhünipoani, se nindou ngorumbo tikefe hefe papihofipoani, se nindouyei kaki napo semindimbo tikai hoafipoani.

Asu se sihafi meapembo ndondondowapiri,” mehu. <sup>20</sup>Asu nindoumayu ranai hoafiyuhi yahuya, “Ro akidouyahambe sini haponda muṅguambo rani ahinümbi hohoanimo ra himboriya sünguriheambo-anahi,” mehundo. <sup>21</sup>Sisas ai nindou ranahambo hübudurirühi hipoamborirühi hoafiyuhi yahuya, “Awi se mami-moatükuni mbonimborandifimbo-anafi. Se ngafi muṅgu-moatükuni asihoeŋi ra kakifihimbo koandihoeŋi raniŋihindi kaki ndowandifi. Asu kaki ra napokoatemaye aheimbo dabadüri. Rananimbo sihambo takini sünambe yagodoninimboe. Asu rananimbo se wambo süngundowandiri,” mehu. <sup>22</sup>Nindou ranai hoafi ra himboriyu hayambo afindi hohoanimo kapehi ndamefiyu ai napo afindembi-wambo. <sup>23</sup>Raniyu asu Sisas ai ahambo süngururü-rundeimbimbo hübudureapuri haya hoafiyupurühi yahuya, “Nindou napo afindembiwambo ana tiṅiyomboane God ṅginindi hifandarandi ranambe kefoefembo ana,” mehu. <sup>24</sup>Asu ahambo süngururü-rundeimbi ai hoafi ranahambo mahepünafundi. Raniyo asüakai hoafiyupurühi yahuya, “Wandi nimoakidibou, God ṅginindi hifandarandi ranambe kefoefembo ana tiṅümbi safane. <sup>25</sup>Tiṅümbi safane napo afindembi ai God ṅginindi hifandarandi ranambe kefoefembo! Iṅga Kemor ai hoeari kakimbo nir ambe ranambe karefoendi ana, tiṅümbiyopoani,” mehu. <sup>26</sup>Asu raniyomo ahambo süngururü-rundeimbi ai afindi hamindi hepünafundühi ahamundihoari simbori ndüwurimefundi. ‘Rawefeyo ana, asu didai yangiri aboedambomandifia?’ <sup>27</sup>Ai ahamumbo hübudureapurühi yahupuriya, “Ndani moatükuni ana ṅgiri nindou aheihoari randihindi. Iṅga God animbo randeambui. God ai-animbo muṅguambo moatükuni randeambui,” mehu. <sup>28</sup>Asu Pita ai Sisasimbo hoafiyundühi yahuya, “Ro muṅguambo moatükuni hiniṅgiriho hohu sihambo sünguarahunini,” mehuamboyu. <sup>29-30</sup>Ai hoafiyupurühi yahuya, “Ro sihamumbo anihondumbo-anahi hoafehapuri. Muṅguambo nindou didiyei ai ahei ṅgoafi, apodohomami, rehimami, hondafindi, nimori asu nümbüri wambo süngufembo hündambo hiniṅgarihindi ana, ai 100 raniwami nandühi ndahümündeimboyei. Asu ai hifi ndanühi niṅboadeiambe ndahümündeimboyei. God ai muṅgu moatükuni dagadürümbui horombo ai masihendi ra ṅgasündühi hehimbo ndahümündeimboyei. Ai wori, apodohomami, rehimami, nimorehi, boagiri nimorakidibou asu nümbüri ndahümündeimboyei. Asu aheimbo moaruwaimbo-ndihindürimboyei, ṅga ai yangiri koadürümbo ndahümündeimboyei. <sup>31</sup>Nindou afindi didiyei ai haponda horomboehindi aiana süngunindeimboyei, ṅga haponda süngunaye ai-animbo horombondahimboyei,” mehu.

**Sisas ai ahandi yifimbo ṅgimimbo hoafimayu**

*(Matyu 20:17-19; Ruk 18:31-34)*

<sup>32</sup>Sisas ai Serusareminambo ahandi süngururü-rundeimbi babidi mahafomo. Iṅga asu Sisas ai horombofi mahafua raniyomo asu ahambo

sünggururü-rundeimbi ai afindi hohoanimo-memondamboyo asu nimorehi nindowenihi ahamundi süngu mahahüsi ranai afindi hohoanimomaye. Asükaiyu Sisas ai ahambo sünggururü-rundeimbi sepurimündü haya huhu nini-moatükuni ahambo tüküfemboayo ranahambo wataporimbomrapuri. <sup>33</sup>Sisas ai hoafiyuhi yahuya, “Himboriyomo, sihiri ana Serusareminamboanefi ahahifi, nga ranüh-animbo Nindou Hondü ranahambo ahinümbi hohoanimo fifirundeimbi asu Godimbo sihou-rundeimbiyomondi warihündüfimbui. Rananimbo asu rani nindou ranai Nindou Hondü ranahambo yifimbiyuwamboane mbisimboemo. Asu ranahambo Suda-yafe ndifoyei warihündühorimboyei. <sup>34</sup>Nindou ranai ahambo tikifindahüdo asu guri tifindahindo ndühümboyei. Asu ahambo harindimondomboemo ndifurimbi moatükuninambo hifokoandüwurümboemo. Nga asu ngimi sindu hayambo-animbo asu yifihündi asukai botindifimbui,” mehu.

**Sems asu Son ai adükari tüküfembo hoafimefani**

*(Matyu 20:20-28)*

<sup>35</sup>Sems asu Son Sebedindi nimori yimbu ai Sisasimbo-so tükümeFINEANDI. Raniyafani hoafiyafandühi safaniya, “Yamundo-randeimbi, ro sihambo yihoehimbo mami-moatükuni randowandi sehoahoa düduarihoanini,” masafani. <sup>36</sup>Sisas ai düdureapirühi yahuya, “Se wambo nini-moatükunimboyafani refepirimbo yifirayafana?” <sup>37</sup>Ai hoafiyafandühi safaniya, “Se sihafi himboamupuimbo-randeimbi fondi raniwami nimarifi hifandarandi ana, ro yifirayehi se ndowandifimuni se amarifi fondi ranambe nimandefomboane. Nga asu rananimbo ngorü ai warihondünindu asu ngorü ai kadüdaniyu mbirandamboane,” masafani. <sup>38</sup>Sisas ai hoafiyupirühi yahuya, “Se ana moai fifirineandi nine-moatükuni se düdueFINEANDI ranahambo. Se asübusi ro semindimboayahä ra mandowandifaniyo? Asu se ro hundürayahi yahurai ra hundürümandafaniyo?” mehu <sup>39</sup>“Ranana randihoamboyei,” safani hoafimefani. Asu Sisas ai hoafiyupirühi yahuya, “Se tiñirifo ra ndowandümboemo ro asahamindihä nou. Asu ro hundürayahi yahurai se-amboani hundüründimboemo. <sup>40</sup>Awi, ro sihafanimbo ngiri yini mbisahapiri wandi warihondani asu kadüdani nimarimbo ra. Nga bidifiri nindou animbo rani fondi raniwami ana nimanideimboyei. Rani fondi ranana aheimboyo ndindofe hiningimefeyo,” mehu. <sup>41</sup>Asu sünguru-ndeimbi 10 ranai ra himboriyomo mburumbo asu Son, Sems ahafanimbo nginindimarupiri. <sup>42</sup>Sisas ai ahambo sünggururü-rundeimbimbo muñguambo mborai yahupuri hürihepuri hayambo hoafiyupurühi yahupuriya, “Suda-yafe ndifo nindou mami ranahambo dükariorühüya hifandirandeimbi asei. Se fifirihindi hifandirundeimbi ai ahamundi nginindi ra muñguambo nindumbo nafuimbohünda.



Asu ahei adükari hamindi horomboyafu homondeimbi, ai ahamundi nginindinambo muŋguambo nindoumbo hifandarundüri. <sup>43</sup>Ŋga se rani süngundumboemo. Ŋga nindou didai adükari tüküfembo ehu ana, ai moani farihairandeimbi nahurai mbinüŋguwamboane. <sup>44</sup>Nindou düdi ai adükari hamindi tüküfembo hohoanimoayu ana, ai muŋguambo nindouyei moani ratüpuriyu randeimbi tükümbifiyuwamboane. <sup>45</sup>Mami yahuraiane, Nindou Hondü ai hifinambo makusu ra nindou ai ahambo farihefimboyopoani. Ŋga ai ahandi yangiri niŋgo hohoanimo ra nindou ranaheimbohünda hiniŋgifehü aboedambofendürimboyu makusu,” mehu.

### Sisas ai nindou himboatihari aboedimariri

<sup>46</sup>Sisas ai ahambo süngururü-rundeimbi babidimbo Seriko ŋgoafihü tüküme fundi. Ai tüküyafu mburu nindou afindi safi ranibabidimbo heiane, Bartimeus Timeusindi nimori himboatihari kaki napombo moako moakoyu randeimbi ranai nafikimi mamaru. <sup>47</sup>Ai Sisas Nasaretihündi akimi asünu hoafi ra himboriyu haya puküna hoafi karihoehü yahuya, “Sisas, Defitindi ahui, se wambo hipoamborowandiri,” mehuamboyo. <sup>48</sup>Asu Nindou afindi mahei ranai nindou himboatihari ranahambo afoai hoafi kikirandifi masahüdo. Ŋga nindou ranai asükai puküna hoafi karihoehü yahuya, “Sisas, Defitindi ahui, se wambo hipoamborowandiri,” mehundo. <sup>49</sup>Sisas ai nüŋgumbo hoafiyuhi yahuya, “Nindou ranahambo hoafiyahündoani ndühi mbüsünu,” mehuamboyo. Asu nindou afindi ranai himboatihari ranahambo mborai masahüdo. Ai hoafiyahündowohü seiya, “Hihifi-hihifi kapeihü botiyafu! Ŋga Sisas ai sihambo mborai mehu,” masahüdo. <sup>50</sup>Raniyo nindou himboatihari ranai horipirohoei piyu haya ahandi ngisihari hoeari yare sihai haya Sisasimbo sowana mahu. <sup>51</sup>Sisas ai düdurirühi yahuya, “Ro sihambo nini-nünüŋgufeninimboyo se hohoanimoayafa?” mehundoamboyo. Asu himboatihari ranai simbori hoafiyuhi yahuya, “Nindou Yamundo-randeimbi, ro asükai himboarinda samboanahi,” mehundo. <sup>52</sup>Sisas ai hoafiyundowohü yahuya, “Se anihondüamboarowandi rani süngumbo aboediyafimboanafi, ŋga hafi,” mehundoamboyo. Asu mamihari asükaiyu hoeireandühi Sisasimbo nafisüŋgu süngumarüri hu.

### Sisas ai Serusarem ŋgoafambe adükari bogori nindou nahurai tüküme fiyu (Matyu 21:1-9; Ruk 19:29-38; Son 12:12-15)

**11** <sup>1</sup>Sisas ai ahambo süngururü-rundeimbi babidimbo Serusarem ŋgoafikimi akimi tiferundühiyomo Orif hifi wafuhi Betefage asu Betani ŋgoafihü tüküme fundi. Ai ahambo süngururü-rundeimbi yimbu koarihepirühi yahuya, <sup>2</sup>“Ŋgoafi gogu anango raninambo ŋgafani. Se ŋgoafambe tükündafineandühi dongi hoarifi nindou ai horombo

semindi hokoate nimifihi wofinambo himondindümo hiniñgindundani niñgowa nimehünou hoeindineambo yafani. Se wofi fufurindhene hena ndowandifani dügufani. <sup>3</sup>Asu nindou mami ai sihafanimbo düdündüfipirühiya, ‘Nimboe doñgi ra sowandifani ahüfana?’ ehu ana, asu se hoafindafinadowohü animboya, ‘Adükari ai ranambo ratüpurindu mbunda ñgiri amitata koandihendi,’ mbisafani,” mehu. <sup>4</sup>Ai hafani hoerineandane doñgi ranai nafini wori nafitambe kimi himondirundümo hiniñgirundani maniñgo. <sup>5</sup>Ai wofi fufuriheneandane, nindou akimi maniñgomo ranai düdürüpirühi yahomoya, “Se nini-nününgufemboyo doñgi ra wofi fufurariheneanda?” mehomondambo-yafani. <sup>6</sup>Asu Sisas ai hoafimayupiri süñgu simbori hoafimefinapuri. Raniyo nindou-memo ranai doñgi ra semindi hombo ahafanimbo yini mehomopiri. <sup>7</sup>Ai doñgi ra sowandifani hüfani Sisasimbo-so tüküyafine ahafandi hoandari hoeri ra doñgiwami manandineanda raniwami Sisas ai mamaru. <sup>8</sup>Raniyei nindou afindi ranai ahei ñgisihari hoeri yimündibadihümündi nafini korihi hei asu bididifiri ai mbeyemü nahurai hutühümündi korimarihi hei. <sup>9</sup>Nindou afindi ranai puküna hoafi karihehindühi seiya,

“Godimbo hihifi-hihifimboane!

God ai nindou Adükarindi ndürinambo asünü ranahambo aboedi aboedimbirramboane.

<sup>10</sup>Sihefi amoa Defitindi srambeahindi adükari bogori hapondani sihefimbo hifandiyomunimboayu ranahambo God ai aboedi aboedimbirramboane.

God nimoamo hondü amaru ranahambo hihifi-hihifimboane!”

*Buk Song 118:25-26*

masei. <sup>11</sup>Sisas ai Serusaremi hü tüküfi haya hu Godindi worambe muñgu-moatükuni hübudura wakimareandi. ñga asu ndeara nimbifembo yanggirimayowamboyo ai ahambo süngururü-rundeimbi <sup>12</sup>ranibabidimbo Betani ngoafinambo hihiriyafu mahomo.

**Sisas ai fik hoandasüfo nimindi nahurai ranahambo  
yowani hisiyopoani mehu  
(Matyu 21:18-19)**

<sup>12</sup>Ñgorü sinambo Betani ngoafihündi sifomondühiyo, Sisas ai wembombomayu. <sup>13</sup>Raniyu fik nimindi ranai akidou anguni safi emündü afindi momoriyo haya maniñgowa hoeimareandi. Ai fik hisi kiarhipo yahu haya akimi himboambo mahu, ñga ai moai hisi mami amboani kiarowa hoeriri. Ai emündü yanggiriyo afindi momorimayo, sapo ranana fik hisambeyopoani, ñga ranimbo wamboyo. <sup>14</sup>Sisas ai fik nimindi ranahambo hoafiyundowohü yahuya, “Se yowani asukai hisiyowani nindou ai fik sesipoani,” mehuamboyo. Asu ahambo süngururü-rundeimbi ai hoafi hoafimayu ra himborimemo.

**Sisas ai Godindi worambeahindi nindou kaki semindimbo ratüpuri  
ratüpurimemonda hemoafoareapuri**

(*Matyu 21:12-17; Ruk 19:45-48; Son 2:13-22*)

<sup>15</sup>Sisas ai ahambo süngururü-rundeimbi babidimbo homo Serusarem ngoafihü tüküyafu houmbo Godindi worina mahu. Ai hu himboyuwane nindou ai ranambe napo kakifihi sihou sowandümo raraomaründa bukürimafoareapuri. Ai nindou kaki nandu houmbo siseru asu nindou nimarimo ndu kakifihi sihou-marundi ahamundi nimarifondi ra hihire amoahimareandi. <sup>16</sup>Asu ai nindou ranahamumbo Godindi wori rani papambe fufuemindi horambo yowani mehupuri. <sup>17</sup>Raniyu nindou ranahamumbo yamundeapurühi yahuya, “Godindi bukambe yare hoafiyowohü yahoya,

‘Wandi wori ana muṅguambo hifihüendi nindou ai ho wambo didibafife worane,’ *Aisaia 56:7, Jeremaia 7:11*

meho. Ŋga se hümbuhüni nindouyei dibonapife fondi nahurai rawarihindi,” mehu. <sup>18</sup>Godimbo sesi sihou-rundeimbi bogoriyomo asu ahinümbi hohoanimo yamundu rundeimbiyomo ai ranühi hoafi ra himboriyomo houmbo Sisasimbo hifokoeffimbo nafi kokomarundi. Ai ramefundü ra sapo nindou ranai Sisasindi yamundife hoafi ranimbo hepünahi marihünda ranimbo yihimborurühi. <sup>19</sup>Asu nimbambeahi Sisas ai ahambo süngururü-rundeimbi babidimbo Serusarem hiniṅgiru houmbo mahomo.

**Nindou düdi ai anihondümbofe hondü anihondümboreandühi  
didibafefiyu ana, ai ndemündümbui**

(*Matyu 21:20-22*)

<sup>20</sup>Ŋgorü-simboani siambeahi Sisas ai ahambo süngururü-rundeimbi babidimbo homondühiyo hoeirundani fik nimindi ranai nimbimayo. Ai nimbimoyowohü emündü asu ahasihari muṅguambo yapataparimayo. <sup>21</sup>Sisas ai fik nimindi ranahambo hoafimayundo ra Pita ai fifire haya hoafiyundowohü yahuya, “Nindou Yamundo-randeimbi hoeiro, fik nimindi se hoafimayafindo ranana nimbioyo haya aniṅgo,” mehu. <sup>22</sup>Asu Sisas ai simbori hoafiyupurühi yahuya, “Se Godimbo yangiri anihondümbondundi. <sup>23</sup>Ro sihamumbo anihondümbore-andühi hoafehapuri. Nindou mami ai yimbu hohoanimokoateyuhü nimoei wafu ndanahambo siriwara-ambe karihoe fi hanifi ehu ana, ai hoafimayu süngu randifemboe. <sup>24</sup>Ranimboane ro sihamumbo hoafehapuri, se nini-moatükuni semindimbo anihondümborundühi ndahumindemboyefi yahomo houmbo didibafefundi ana, rani-süṅgunambo animbo ndowandümbemo. <sup>25-26</sup>Asu se botindafu niṅgomombo didibafindafundühi nindou ŋgorü ai sihambo moaruwai ramareandi

ra hohoanimoayafi ana, amboawi mbisafindo. Rananimo asu God ai simbori sihafi hohoanimo moaruwai ra amboawi mbüsümbui,” mehu.

**Sisasimboya düdi sihambo ngingindi masaganini yahomo houmbo düdumefundi**

*(Matyu 21:33-46; Ruk 20:1-8)*

<sup>27</sup>Sisas ai ahambo süngururü-rundeimbi babidimbo asukai Serusarem ngoafihü tükumefundi. Sisas ai Godindi worambe huane Godimbo sesi sihou-rundeimbi, ahinümbi hohoanimo fifirundeimbi asu bogori nindou ai ahambosowana mahomo. <sup>28</sup>Ai Sisasimbo düdururühi yahomoya, “Se ndani ngingindi ra nahanihündambo sowandifimboyafa? Didandi ngingindi nda sihambo masaganinamboyafi ndani ratüpuri rawarowanda?” mehomondamboyu. <sup>29</sup>Asu Sisas ai simbori hoafiyupurühi yahuya, “Roamboani sihamumbo simbori mami düdufe düdundiheapurimboyahi. Se wambo simbori hoafemondindiri ana, asu ro ndani ratüpuri ratüpuri ngingindi düdi masendiri ra hoafindahapurimboyahi. <sup>30</sup>Se wambo hoafiyomondindiri, Son ai nindou hundürüra-marandi ngingindi ra Godindi-mayoyo, asu hifi ndanühindambo nindou-yomondi-mayoyo?” mehu. <sup>31</sup>Ai ahamundihoari simbori hoafiyomondühi yahomoya, “Sihiri Godindi-mayoane asefi ana, ai sihefimboya asu nimboe anihondümbofe-koateayomoa? mbüsümbui. <sup>32</sup>Ŋga sihiri hoafiyefühiya hifinindi nindou-yafemayoane asefi ana, asu muŋguambo nindou ai fifirihindi Son ai Godindi hoafi hoafiyu-randeimbani,” mehomo. <sup>33</sup>Ranimboyo ai hoafiyomondühiya, “Moai fifirihundi,” mehomondamboyu. Asu Sisas ai simbori hoafiyupurühi yahuya, “Roamboani düdi ngingindi masendiri ra ngiri hoafindahipuri,” mehu.

**Nindou moaruwai wain nümbüri hifandimarundi kafeefe hoafi**

*(Matyu 21:23-27; Ruk 20:1-8)*

**12** <sup>1</sup>Sisas ai Suda-yei bobaagori ranahamumbo kafeefe hoafi hoafiyuhi yahuya, “Nindou mami ai wain nümbüri nümbürira mbura ginirimayu. Waini hisi ra bubütükimbohünda hifi ambe kikira mbura nümbüri ra hifandimbo dago hura hiniŋgimareandi. Nümbüri ra ngorü nindou-yomondi warühi kaki semindi ratüpuri ngingire haya ahandihoari ŋguni hifina mahu. <sup>2</sup>Waini ranai hisimayowamboyu nümbüri aharambüri ranai ahandi ratüpuriyu randeimbi koamariheirü. Ai ŋguwani nümbüri ranambeahindi sesi bidifiri mbisabudowa yahu haya. <sup>3</sup>Ŋga nümbüri hifandimarundi ranai ratüpuriyu-randeimbi ranahambo mburündümo houmbo bubururü mburu nini akidou warambefendokoate koamarihawuri. <sup>4</sup>Asu nümbüri aharambüri-mayu ranai asukai ratüpuriyu-randeimbi ngorü koamariheirü. Raniyo ranahambo amboani mbiro burüwuri

mburümbo moaruwai moaruwaimbomarüwuri. <sup>5</sup>Asüakai ngorü ratüpuriyu-randeimbi koamariheirü. Iḡga ranahambo hifokoamarüwuri. Asu asüakai süngunambo ahandi ratüpuriyomo rundeimbi afindi koamarihepuri. Nümbüri hifandirundeimbi ranai bidifiri buburupuri koamarihoupuri asu bidifiri hifokoamarupuri. <sup>6</sup>Nindou nümbüri hifandimarundi sowana koehefembo ra nümbüri aharambüri ahandi ḡgusüfo parireimbi nimori yangiriyu manüḡgu. Iḡga bidifiranambo ahamumbo sowana koamariheirü. Afindi ai hoafiyuhiya wandi nimorindi hoafi animbo himborindimboemo yahu haya koamariheirü. <sup>7</sup>Iḡga nümbüri hifandimarundi ranai ahamundihoari simbori hoafiyomondühi yahomoya, ‘Ndanana nümbüri aharambüri nimir-ani. Sihiri ahambo hifokoandihurühi animbo nümbüri ra sihefimbeyo-wamboane,’ mehomo. <sup>8</sup>Raniyo nimori ranahambo kikihiründümo mburu hifokoarüwuri houmbo ahandi finimoko ra wain nümbüri giniri hundüni pimarüwuri,” mehu <sup>9</sup>Asu Sisas ai düdufihi yahuya, “Nümbüri aharambüri ranai nini-nüḡgumandea? Ai düdü wain nümbüri hifandimarundi ra hifokoandepurühi wain nümbüri ra ngorü nendambo asüakai dagapurümbui. <sup>10</sup>Awi seana Baiborambe hoafi mapeniḡgo ra hoeimbarundiyoapani. Ai yare hoafiyowohü yahoya,

Kambohoani worimboru-rundeimbi ai moaruwaiane yahomo  
houmbo masihoemo  
ranane asu hapondani wori ḡginemindimbo bogimondi  
kambohoanimbofemboayo.

<sup>11</sup>Adükari ai ahandihoari ramareanda tüküme feyoane,  
ranane ro hoeirihundani aboedihamindayo,” *Buk Song 118:22-23*  
mehu. <sup>12</sup>Suda-yei bobaagori nindou ranai fifirundi ahamumboyo rani kafe fe hoafi ra Sisas ai wataporimbomarandi. Ranimboyo Sisasimbo ranühi kikihimindimbo hohoanimomemo. Iḡga nindou afindi ranaheimbo yihimboyomondühiyo, raru hiniḡgirüwuri houmbo mahomo.

**Takis kaki sai hohoanimo ranahambo Sisasimbo düdumarihori**  
(*Matyu 21:18-19*)

<sup>13</sup>Suda-yei bobaagori nindou ranai Farisi nindou bidifiriyomo asu Herotindi nendi bidifiriyomo ahamumbo Sisasimbo sowana koamarihoupuri. Ai tikefe hefemboya Sisas ai moaruwai hoafi hoafimayu yahombo yahomo houmbo mahafomo. <sup>14</sup>Nindou ranai homo Sisasimbo hoafiyomondühi yahomoya, “Nindou Yamundo-randeimbi, ro fifirihumboanefi, seana nindoumbo yihimbokoate anihondümbö-anafi hoafiyafi arandi. Seana nindou ndüreimbiyei asu ndürikoateyei ranaheimbo moai hohoanimoyafi, ḡga God yifirayu hohoanimoane nindou yamundo arandi. Asu se nüḡguro hohoanimoyafa? Romiyafe adükari bogori Sisarimbo takis kaki saimbo ra ahinümbiyo, waniyo? Asu sihiri takis kaki saimbo ra ahinümbiyo, waniyo?”

mehomo. <sup>15</sup>Asu Sisas ai ahamundi wosihoafi hoafi ra fifire haya hoafiyuhi yahuya, “Nimboe se wambo refe hoeifendirimbo ehomoa? Kaki hoari mami sowarundumo sinimo animbo ro hoeindihea!” mehu. <sup>16</sup>Nindou ranai kaki hoari sowarundumo homo masabudowamboyu dudureapuruhi yahuya, “Nduri asu sisami nda dadea?” mehuamboemo. Asu ai hoafiyomonduhi yahomoya, “Sisarindane,” mehomo. <sup>17</sup>Asu Sisas ai hoafiyupuruhi yahuya, “Sisarindi moatikunayo ra Sisarimbo ndabudo. Asu Godindi moatikunayo ra Godimbo ndabudo,” mehuamboemo Sisasindi hoafi ranahambo mahepufundi.

**Nindou yifihundi botife hoafi ranimbo Sisasimbo dudumefundo**  
(*Matyu 22:23-33; Ruk 20:27-38*)

<sup>18-19</sup>Sadyusi ai hohoanimo-yomonduhiya, nindou yifiyembi ai ngiri asukai yangiri botindahindi yahomo-rundeimbi ai homo Sisasimbo duduyafunduhi yahomoya, “Nindou yamundo-randeimbi, Moses ai sihefimbo ndani ahinumbi hohoanimo nda suru papimarandi. Nindou mami ai nimorehi semundü haya nimori-koate nindowenihi ai yifayu ana, amongoandi kai ra akidi ai mbisemundu-wamboane. Rananimbo ahandi amongoandi fondambe nindou wanindimboemo-hunda nimori kambirineandamboane. <sup>20</sup>Mamimbo apodoho mami 7 maningomo. Amongo hondü ranai nimorehi ra semundü haya nimori mbuimindikoaate yifiyuhiyu asu nimorehi ahandi ra ranikiminindi akidimayu ranahambo hiningimareandi. <sup>21</sup>Raniyo nimorehi ra asukai akidi ngörü ai semundü haya nimori kefekoate yifimayu. Raniyo asukai akidi ngörü ranikiminindi ai-amboani mami yahurai ramefiyu. <sup>22</sup>Mami yahurai apodoho mami 7 ranai ramefundi. Raniyo süngunambo nimorehi ranai amboani yifimayo. <sup>23</sup>Apodoho mami ranai nimorehi ra muŋguambo masowandumo. Ŋga süngunambo nindou ranai yifihundi botifeambe apodoho mami ranai botindafunduhi asu nimorehi ra dadi nimorehi manda?” mehomo. <sup>24</sup>Sisas ai hoafiyupuruhi yahuya, “Se moai Baiborambe hoafi apenigo ra fifirundi asu Godindi nginindi fifirundi. Ranimboane se mamikari hoafayomo. <sup>25</sup>Nindou yifiyembi ai asukai yangiri botehindi ana, ngiri anaminduhi-ndahi asu nimorehühi-ndafu ndühündi. Aiana sunambeahindi nendi nahurai niboadeimboyei. <sup>26</sup>Ŋga nindou yifiyembi yifihundi botife ra awi se Mosesindi buk nimi akidou hai imami tükumefeyo ra se hoeimbaruyo? Hoafi suru mapenigo ranambe God ai Mosesimbo hoafiyuhi yahuya, ‘Roana Abrahamindi God-anahi, Aisakindi God-anahi, asu Sekopindi God-anahi,’ mehu. <sup>27</sup>God ana yifiyembiyei Godi yupoani. Ŋga yangiri niboadeimbiyei God-ani. Sihei hohoanimo ana hihindi hohoanimoane,” mehu.

**Godindi weangurühindi ahinumbi hohoanimo**  
(*Matyu 22:34-40; Ruk 10:25-28*)

<sup>28</sup>Ahinumbi hohoanimo fifireandeimbi ai süfuane Sadyusi ai Sisas babidimbo simbori hoafimemo. Raniyu ai himboriyuane Sisas ai

ahamundi düdufe hoafi ra simbori aboedi hoafimayupuri. Raniyu Sisasimbo düdurirühi yahuya, “Ahinümbi hohoanimo nahaniyo amuri ranahambo ngasünde haya adükari hamindayoa?” mehuamboyu. <sup>29</sup>Sisas ai simbori hoafiyundohü yahuya, “Ŋgasündeandeimbi ahinümbi hohoanimo ana ndanane: ‘Israer se wudipoapondihi himborindei. Adükari mami yanggirani sihefi Godayu. <sup>30</sup>Se sihefi God Adükari ranahambo ngusüfoambe muŋguambo, yifiafi muŋguambo, hohoanimo muŋguambo, nginindi muŋguambo ranambo ngusüfo pandihori.’ <sup>31</sup>Ranikiminindi ahinümbi hohoanimoane nda: Se sihafi wandafi mamimbo ngusüfo pandowandüri sihafi fimbo rawarowandi nou. Moai ngorü ahinümbi yimbu ndanahafembo ngasündeandeimbi yangoro,” mehu. <sup>32</sup>Ahinümbi hohoanimo fifireandeimbimayu ranai Sisasimbo hoafiyundohü yahuya, “Nindou Yamundo-randeimbi, se hoafayafi ra aboedane. Anihondane moai ngorüpoanimbo God nungu, nga Adükari God mami yanggirani anungu. <sup>33</sup>Ranimboane Godimbo ngusüfoambe muŋguambo, fifirife muŋguambo, nginindi muŋguambo ranambo ngusüfo pefembo asu wandafi mamimbo ngusüfo pefembo sihefi fimbo rawehundi nou randihumboane. Sihiri yimbu hohoanimo ra rawarihundi ana, Godimbo sesi muŋgu mandife asu ninihondi hifikoeffe mandife sihefe ra ngasündeamboane,” mehu. <sup>34</sup>Sisas ai hoeireandane ndore fifireandeimbi hoafi simbori hoafimayamboyu ai hoafiyuhi yahuya, “Se God nginindi hifandarandi ra akimisafi animbafi.” Sisas ai yare hoafimayua amuri ranai ahambo düdufe hoafi hoafimbo yihimbomemo.

**Sisas ai düdi Krais-ayu yahu düdumefiyu**

*(Matyu 22:41-46; Ruk 20:41-44)*

<sup>35</sup>Sisas ai Godindi worambe nindou yamundearühi düdufihi yahuya, “Nimboe ahinümbi hohoanimo fifirundeimbi ai Krais, nindou ra God ai ahandi nendambo aboedambofembo kamafoariri, ranahambo Defitindi nimor-ani ehomoa? <sup>36</sup>Yifiafi Aboedi ai Defitimbo hohoanimo masagadowa hoafiyuhi yahuya,

‘Se wandi warihondü warani nimandifi ngafimbo sihafi hürütümbi ra sihafi hoarehi hiningindiheapuri-mboyahi,’ *Buk Song 110:1* mehu <sup>37</sup>Defit ai Kraisimbo Adükari yahundo-marandi, asu nungunde ahandi nimori mandü-a?” mehu.

**Sisas ai ahinümbi hohoanimo fifirundeimbimbo ahini hoafimayupuri**

*(Matyu 23:1-36; Ruk 20:45-47)*

Nindou afindi ranai yanggorimbo Sisasindi hoafi himborimbo hihifi-hihifimayei. <sup>38</sup>Ai yamundeandürühi yahuya, “Ahinümbi hohoanimo fifirundeimbimbo hibadihumbo. Aiana wari hoandarümbi hoeari yihuruyo hefe maketambe howani nindou ai ahiniyeihi

hihifi-mbirihümuni yahomomboanemo hohoanimoemo. <sup>39</sup> Aiana rotumbo-hünda rotu worambe asu sesesambe ra weangurühindi fondiwami wagabe nimarimboanemo hohoanimoemo. <sup>40</sup> Aiana nimorehi kaisahoabedi ranaheimbo wosihoafari hoafiyomondürühi ahei wori kosiründümo asu tikarhoumbo hoandari hamindi didibafiyafu arundi. Ranimbo-hündambo animbo papi hoafi yibobofoambe ahamumbo ana tiñirifo ra moaruwai hamind-animbo ndimboe,” mehu.

### Nimorehi napokoate Godimbo kaki masihendi

(Ruk 21:1-4)

<sup>41</sup> Sisas ai Godindi worimbo kaki hipiri fikimi nimarwane nimorehi nindowenihi ai hipiri ranambe hei kaki mafoarihindi. Nindou kaki afindeimbi ranai afindsafi hipiri ranambe hei mafoarihindi. <sup>42</sup> Asu nimorehi napokoate kai ranai hamburi kaki yimbu toea sepirimindi ho hipiri ranambe mafoareapiri. <sup>43</sup> Sisas ai ahambo süngururü-rundeimbimbo mborai yahupuri gugureapuri haya hoafiyuhi yahuya, “Ro sihamumbo anihondumbo-anahi hoafehapuri. Nimorehi kai napokoate kaki Godindi wori hipirambe masihendi ranana napo afindeimbi masihendi ranhambo ngasündeamboane. <sup>44</sup> Nindou napo afindeimbi ranai ana ahei adükari mbegorindüri, nga akidou mafoarihindi. Nga nimorehi kai napokoate ranai ana ahandi sesi pemimboyoweimbi-mayo raniyu munju masihendi,” mehu.

### Sisas ai Godindi wori bireboemboe mehu

**13** <sup>1</sup> Sisas ai Godindi wori hinigire tüküfiyuane ahandi süngururü-rundeimbi mami ai hoafiyuhi yahuya, “Nindou Yamundo-randeimbi, wori aboedi safi asu nimoei adükari ra hoeiro,” mehundo. <sup>2</sup> Sisas ai simbori hoafiyuhi yahuya, “Se wori afindi ndanahambo hoeiarowandi. Ngiri nimoei mami amboani ngoründiwami nanjo, nga hifitireboai pindimboe,” mehu.

### Sisas ai tiñirifo afindi tükündifemboe mehu

(Matyu 24:3-14; Ruk 21:7-19)

<sup>3-4</sup> Sisas ai Orif hifi wafuambe nimarü himboyuane, Godindi wori ai anguni goagu mafondaro. Asu Pita, Sems, Son, Andru ai yangiri masifomo. Ai sifomo Sisasimbo düdurüwurühi yahomoya, “Hoafiyafimuni rani-moatükuni ra nüngusumboani tükümandifea? Asu nini-moatükuni boatei tükündifemboe mbisefi fifirimandihua?” mehomondamboyu. <sup>5</sup> Asu Sisas ai hoafiyupurühi yahuya, “Se hibadumbo, nga nindou mami sihamumbo wosihoafari hoafindapurümbui. <sup>6</sup> Nindou afindi ranai ngomo wandi ndüri dükandundühiya, ‘Ro nindou rananahi nda,’ mbisimo houmbo nindou afindi wosihoafari hoafindundürimboemo.



7Asu se yifiarindimondani himborindimondühane, asu yifiari hoafi yanggiri anggunipoedi himborindimondühane ra se yowani afindi hohoanimondimboemo. Rani-moatükuni ra tükündifemboesi, nga asu rani-moatükuni tükefeyo ranahambo awi bidifiranambo siane yahopoani. 8Hifi-hifi ranai simbori yifiarindomboe. Asu adükari bogori nindouyafe nendi ranai simbori simborindimboemo. Hifi bidifiri ranifihise ai wanindimboe asu hifihe ranai tükündifemboe. Muŋguambo moatükuni ranana nimorehi ai nimori wakemindimbo yaho haya asubusi boatei asemindo nahuriane tükefeyo. 9Ranisimboani animbo se hibadumbo. Ai sihamumbo mbundüpundümo houmbo kansiriyafe himboarühi papi hoafindüpurimboemo. Asu Suda-yei rotu worambe bubundüpurimboemo. Wambo sünguna ahamundi adükari bogori asu hifandirundeimbi ahamundi himboahü niŋgomboemo. Nga refeambe animbo Aboedi Hoafi ahamumbo wataporimbondüpuri. 10Nga bidifiranambo si ranai tüküfekoateyoambe nindou muŋguambo ranai aboedi hoafi ra himborindei hehimbo animbo. 11Sihamumbo mbundüpundümo houmbo kotambe ndowapundümo ngomondani se yowani nini hoafi hoafimandefi yahoeffembo yihimboyopoani. Moani rani-simboani hamindi animbo se hoafimbo ra God ai horindeapurumbui. Asu ngiri se sihamundihoari wataporimbondundi, nga Yifiafi Aboedi ai-animbo wataporimbondamboe. 12Nindou ai ahamundi amongo mami asu akohoandambo papi hoafindüpuri mbundumbo hifokoefepurimbo hoafindimboemo Asu afindi ai mami yahurai randeambui. Asu nimori ai ahandi hondi afindambo moaruwaimbondeapirühi nindoumbo hoafinduani hifkoandüpürimboemo. 13Wambohünda muŋguambo nindou ai sihamumbo moaruwaimbo-ndihipurimboyei. Nga asu didiyei moanane sei nginindi animboei hei ana, God ai aboedambo-ndearumbui,” mehu.

**Moaruwai hamindi moatükuni tükündifemboe**

*(Matyu 24:3-14; Ruk 21:7-19)*

14Sisas ai hoafiyuhi yahuya, “Se hoeindundani moaruwai hamindi moatükuni sürühoeimbi fondiwami niŋgomboe. Nindou düdi ndani hoafi nda ritimarandi ana, ai fifirimbireandamboane. Ranisimboani nindou Sudia hifihü animboei ai nimai fefoehi hehi hifi wafuanambo mbihahüsiamboane. 15Asu nindou ai woriwaminindi akusifoendi ra ai yowani ahandi napo fufoemindimbo worinambo keboembui. 16Asu nindou düdi nümbürambe anüŋgu ranai yowani ahandi warihoandari hoeari semindimbo ngumbui. 17Ranisimboani nimorehi warandühumbanei asu nimori kehureimbanei aiana hipoanimboembouanei. 18Se Godimbo didibafindafundani animbo rani-moatükuni ranai ngisihari afindi tüküfeyoambe tüküfekoateybeyo-wamboane. 19Nimboe sapo rani-simboani animbo moaruwai hamindi

tiŋirifo tükündifemboe. God ai weaŋgurühi muŋgu-moatükuni nafirandambe moai yahurai tiŋirifo tüküfeyo, asu süngunambo amboani ŋgiri yahurai moatükuni tükündifeyo. <sup>20</sup>Asu Adükari ai tiŋirifo ranahambo bodifoahüfe kikemindikoate mbeimbonana muŋguambo nindou ranai ŋgiri aboedamboyahindi. Ŋga nindou ai wandanei yahu diboniyu hiniŋgimareandüri aheimbo hohoanımondandürühi bodifoahünde kikindeambui. <sup>21</sup>Ranisimboani nindou mami ai siheimbo hoafındundürühiya, ‘Hoeirihi, Krais ini nda,’ mbiseianiyo asu ‘Hoeirihi, ini goagu ra,’ mbiseiani se yowani anihondümbofepoani. <sup>22</sup>Nindou bidifiri ai ŋgomo tikandu houmbo animboya, ‘Ro nda Krais-anahi,’ asu ‘Ro Godindi hoafi hoafiya rihandeimb-anahi,’ mbisimo hou hepünifeimbi moatükuni randumboemo. Ai rarumbo-mbembonana God ai nindou diboniyundüreimbi ranaheimbo tikai hoafiyomondüri. <sup>23</sup>Ranimboane muŋgu-moatükuni tükefeyo ra se hibadihümbo, ŋga muŋguambo moatükuni tüküfekoateyoambe ranahambo hoafayahapuri,” mehu.

### **Süngunambo Nindou Hondü ai kudümbui**

*(Matyu 24:29-31; Ruk 21:25-28)*

<sup>24</sup>Sisas ai hoafiyuhi yahuya, “Rani-moatükuni ranai tükündife hayambondoani animbo,

hüfihamindi ai nimbiraŋi ndamindimboe  
asu amoamo ai ŋgiri sindu.

<sup>25</sup>Mupui ai sünambeahindi firibadeboai pütapindowohü  
asu muŋguambo sünambeahindi ŋginindi moatükuni ranai  
fifimindimboe. *Aisaia 13:10, 34:4*

<sup>26</sup>Ranisimboani animbo nindou ai hoeindihorani Nindou Hondü ai mburingaiwami naŋgu haya ahandi himboamupuimbo-randeimbi ŋginindi kapeihi kudümbui. <sup>27</sup>Ranisimboani animbo ai sünambeahindi nendi koandihapurani ŋgomo nindou God ai diboniyundüreimbi ra hifi ranahandi yimbuyimbu himboranipoedi gugurinduwurümboemo. Ai hifi ranühi fufundündimo ŋgomombo sünü hifi fondeandambe ŋgomo tükündafumboemo,” mehu.

### **Se süfuri nimindi ranahambo fifirindihindi**

*(Matyu 24:32-35; Ruk 21:29-33)*

<sup>28</sup>Sisas ai asukai hoafiyuhi yahuya, “Se süfuri nimindi fifirindundi. Nimi ranai emündü fofoyo ana, se fifirundi ra ndeara hoembo akimi tüküfembo yahomboane. <sup>29</sup>Mami yahuraiane, se hoeindundani muŋguambo moatükuni tükefeyo ra se fifirindundi, Nindou Hondü ai ŋgiri amitata kudu, ŋga ndeara yipuri kimani anüŋgu. <sup>30</sup>Ro sihamumbo anihondümbo-anahi hoafehapuri. Bidifiri nindou hifi ndanühi aniboadei ranai yifikoateyeiambe animbo rani-moatükuni ra tükündifemboe.

<sup>31</sup>Hifi asu sünü ana awarindihoemboe, nga wandi hoafi ana ngiri awarindihoayo, nga wani,” mehu.

**Nindou mami ai-amboani moai Adükari ai tüküfembo si ra fifireandi**  
(*Matyu 24:36-44*)

<sup>32</sup>Sisas ai asukai hoafiyuhi yahuya, “Nindou mami ai-amboani moai rani-moatükuni tüküfemboayo si ra fifireandi. Sünambeahindi nendi amboani moai fifirundi asu Nimori ai-amboani moai fifireandi, nga Afindi ai-yanğirani fifireamboayu. <sup>33</sup>Se hibadumbo ningomo, nimboe sapo rani-moatükuni tüküfembo ra se moai fifirundi. <sup>34</sup>Ranana nindou mami ai ngortügoanini hombo yahu haya, ahandi ratüpuriyomo rundeimbimbo hibadüdi yahu haya ratüpuru yimbureapuri mbura nindou yipuri hifandira-randeimbimbo yipuri wudipoapondo hibadandi ehu nahuraiane. <sup>35</sup>Ranimbo-animbo se hibadumbo nimandümo, nini simboani wori aharambüri ranai tükümandifi, ra se moai fifirundi. Ai nimbambe tükümandifiyo nimbi mbusümbombomandüyo, siambeahimandüyo ra se moai fifirundi. <sup>36</sup>Asu ai nimehünou tükündüfi hoeindeapurani asu se apomboemo. <sup>37</sup>Ndani hoafi ro sihamumbo hoafehapuri ra, muŋguambo nindoumbo kapeih-anahi, nga se hibadihümbö nimandei,” mehu.

**Sudayafe bogori nindou ai nüngündihu Sisasimbo mbundihurimindefi**  
**hifokoamandihuri mehomo**

(*Matyu 26:1-5; Ruk 22:1-2; Son 11:45-53*)

**14** <sup>1</sup>God ai Israerimbo Aboedambo-mareandüra aboedi manimboei si (Pasofa) asu bret yisikoate sesimbo si ra tüküfembo yimbu si manıngo. Raniyo Godimbo sihou-rundeimbiyomo asu ahinümbi hohoanimo yamundurundeimbi ai Sisasimbo kikihimündi hifokoefimbo hohoanimomemo. Raniyo ai hoafiyomondühi yahomoya, “Sihiri nini-süngündihu Sisasimbo wosihofori hoafi ndihuri mbunduhu kikihindihurimindefi hoahu hifokoamandihuri,” mehomo. <sup>2</sup>Ai hoafiyomondühi yahomoya, “Sihiri adükari sihi ana refepoani, nga nindou ai nginindeidei sihefi mbusümo yifiari botindihimboyei,” mehomo.

**Nimorehi mami ranai Sisasindi mbirowami fisiñarümbü**  
**moatükuni kamareandi**

(*Matyu 26:6-13; Son 12:1-8*)

<sup>3</sup>Sisas ai Betani ngoafihü Saimon horombo mımaniho masimeimboyoweimbi ahandi worambe mamaru. Sisas ai nindou ranahandi worambe sesühi nımaruane, nimorehi mami ai nımoei hipırambe sanda aboedi fisiñarümbü kaki afındi fihi semindeimbi

semindi haya tüküme Feyo. Raniyo Sisas ai sesühi nimiruane ai hipiri ra boborehaya sanda ra ahandı mbirowami kamareando. <sup>4</sup>Ŋga asu nindou bidifiri mamarümo ranai ŋginindiyomondühi simbori hoafiyomondühi yahomoya, “Nimboe sanda ra yatikiri-yatikiri aranda? <sup>5</sup>Nindou ai sanda ra kakinambo mbasahümündi-mbonana 300 kaki hoarinambo animbo sahümündihi kaki ra nindou napokoate-yeimbimbo sahündüri,” mehomom. Ranimboemo ai nimorehi ranahambo ŋginindimarundi. <sup>6</sup>Ŋga Sisas ai hoafiyupurühi yahuya, “Nimorehi ra ambe, ŋga nimboe se ahambo ŋginindarunda? Ai aboedi moatükuniyo wambo ramareandi. <sup>7</sup>Nindou napokoateyeimbi ana muŋguambo si seba bidimbo niman deimboyei. Se nini-simboaniyo aheimbo fehefendürimbo hohoanimoye ra fandihindüri. Ŋga ro ana ŋgiri muŋguambo si se-babidimbo nimboahi. <sup>8</sup>Nimorehi ndanai nini-moatükuniyo ai refembomayo raniyo ramareandi. Ai wandi fi sandanambo hundürumarandi ra yifindahani hifikendirimbo mayo ranimboyo rani boatei ramareandi. <sup>9</sup>Ro sihamumbo anihondumbo-anahi hoafepuri, muŋguambo hifi aboedi hoafi ra watorimbondundühi nimorehi ai ramareandi ranahambo hoafindimonda ahambo hohoanimondeimboyei,” mehu.

**Sudas ai Sisasimbo boboagori nindouyomondi  
warihündihinimboeahi mehu  
(Matyu 26:14-16; Ruk 22:3-6)**

<sup>10</sup>Ranisimboani Sisasimbo süngururü-rundeimbi mami Sudas Iskariot ai Godimbo sihou-rundeimbi sowana Sisasimbo ahamundi warihüfimbo mahu. <sup>11</sup>Godimbo sihou-rundeimbi ai rani hoafi ra himboriyomo houmbo hihifi-hihifiyomondühi Sudasimbo bidifiri kaki segodombo hoafimemo. Raniyo Sudas ai Sisasimbo ahamundi warihüfimbo ninüngumandihе yahuhayambo hohoanimomayu.

**Sisas ai ahambo süngururü-rundeimbi babidimbo sesesimemo  
(Matyu 26:14-16; Ruk 22:7-14, 21-23; Son 13:21-30)**

<sup>12</sup>Bret yisikoate sesimbo si ranai weangurühi tüküme Feyo. Ranisimboani ra Pasofa sipsip nimori sesimbohünda hifokoarihi arihündi. Asu Sisasimbo süngururü-rundeimbi ai düduyafundowohü yahomoya, “Se hohoanimoyafani ro sesesimbo ra sihambo nahü ŋgefi didiboado-mandihunda?” mehomondamboyu. <sup>13</sup>Asu Sisas ai ahambo süngururü-rundeimbi yimbu koarihepirühi yahuya, “Se adükari ŋgoafinambo ŋgafani. Ranühi nindou mami hoe hipirambe ndemündü haya nafini düdi tükündüfimbui. Ahambo animbo se süngundiniri. <sup>14</sup>Se hoeindinerani nini-worinamboyu afarifiyu ra se wori aharambüri ranahambo düdundafineandühi animboya, ‘Nindou yamunde-randeimbi ai düdufihya, ‘Wori nahanambe Pasofa si sesi ra sesesimandefi?’

mehuamboanehi,' mbisafani. <sup>15</sup>Rananimbo adükari nimoamondi wori nafirindümo hiniŋgimarundi ra nafuindümbui. Ranühi animbo se sesi ra sindindineandi," mehu. <sup>16</sup>Süŋgurineri-rinandeimbi ranai hafani ŋgoafi ranühi hoeirineandane, muŋgu-moatükuni ai hoafimayu süŋgure meŋgoro. Raniyo ranühi sesesimbo sesi ra sindimarineandi. <sup>17</sup>Ndeara nimbihofafi-mayoamboyo Sisas ai ahandi süŋgururü-rundeimbi 12 ranibabidimbo mahomo. <sup>18</sup>Ai sesi sowasümondühi nimarimombo Sisas ai hoafiyupurühi yahuya, "Ro sihamumbo anihondumbo-anahi hoafehapuri. Nindou mami seambeahindi animbo wambo hürütümbi nindou-yomondi warihündeandirimbui. Nindou ranai hapondani ro-dibombo sesi asesu," mehu. <sup>19</sup>Süŋgururü-rundeimbi ranai rani hoafi ra himboriyomo houmbo ŋgusüfoambe moaruwaimarapuri. Raniyo mamai mamaiyomondühi düdururühi yahomoya, "Awi rombayahipoani?" raniranimemo. <sup>20</sup>Sisas ai hoafiyupurühi yahuya, "Nindou ranana seambeahindani. Ai bret semündü haya rodibo hipirambe afoarihoandi. <sup>21</sup>Anihondane Nindou Hondü ai yifimbiyuamboane. Baiborambe hoafiyohüya, yifindümbui, meho süŋgu. Ŋga nindou düdi Nindou Hondü hürütümbi nindou-yomondi warihariri ranai hipoanimboembouani. Mamihari hondi ai ahambo ana wakemündikoate mbeyowamboyo." mehu.

**Sisas ai ahambo süŋgururü rundeimbimbo wain  
hoe asu bret masagapuri**  
*(Matyu 26:26-30; Ruk 22:15-20; 1 Korin 11:23-25)*

<sup>22</sup>Sowasümondühi nimarümombo Sisas ai bret semündü hifitire Godimbo hihifirüri mbura ahambo süŋgururü-rundeimbimbo yimumareapuri. Asu ai hoafiyupurühi yahuya, "Se sowandümo, ŋga nda wandi fi safane," mehu. <sup>23</sup>Asükai wain hoe kapambe semündü Godimbo hihifirüri mbura masagapura ai muŋguambo masimindimo. <sup>24</sup>Asu Sisas ai hoafiyupurühi yahuya, "Nda wandi horane God hoafi firamündü masihendi ra ŋginemindimbo. Wandi hori karefoendi ra muŋguambo nindoumbo fehefembo-hündamboane. <sup>25</sup>Ro sihamumbo anihondumbo-anahi hoafehapuri, Ro ŋgiri asükainda wain hoe ndimindihi, ŋga moani ŋga ŋgambo God ŋginindi hifandarandi ranambe simbori wain hoe ndimindimboyahi," mehu. <sup>26</sup>Raniyo herü mami herüyomondühi adükari ŋgoafi ra hiniŋgiru houmbo Orif hifi wafuanambo mahafomo.

**Sisas ai Pitamboya ai wambo daboadi hihirindeandirimbui mehu**  
*(Matyu 26:31-35; Ruk 22:31-34; Son 13:36-38)*

<sup>27</sup>Sisas ai ahambo süŋgururü-rundeimbimbo hoafiyupurühi yahuya, "Se muŋguambo sihamundi anihondümbofe hiniŋgindumboemo. Nimboe sapo Baiborambe yare hoafiyowohü yahoya, 'Ro sipsip hifandirandeimbi nindou hifokoandihina

asu sipsip ai buküründahimboyei,' *Sekaraia 13:7*  
 meho. <sup>28</sup>Ŋga yifihündi botindahe hehea roboakori Gariri hifinambo  
 ŋgümboyahi," mehu <sup>29</sup>Pita ai hoafiyundühi yahuya, "Muŋguambo nindou  
 ai sihambo anihondümbofo hohoanimo ra hiniŋgindumboemo. Ŋga roana  
 ŋgiri hiniŋgindiheanini," mehu. <sup>30</sup>Sisas ai hoafiyundühi yahuya, "Ro  
 sihambo anihondümboanahi hoafehanini, ndani nimbokoani kakaro ai  
 yimbumbo hoafikoateayambe animbo se ŋgimimbo hoafindafühiya, ro  
 moai ahambo fifirihini mbisamboyafi," mehundo. <sup>31</sup>Ŋga Pita ai hoafiyuhi  
 yahuya, "Ro ŋgiri moai fifirihini mbisahi, ŋga sedibo yifindamboyahi,"  
 mehuamboemo. Asu bidifiri süngururü-rundeimbi ai-amboani mami  
 yahurai hoafimemo.

**Sisas ai Getsemanihi Godimbo didibafimayu**  
*(Matyu 26:36-46; Ruk 22:39-46)*

<sup>32</sup>Ai homo Getsemani seiarihündi ranühi tüküyafu ahambo süngururü-  
 rundeimbimbo hoafiyupurühi yahuya, "Se ndühi nimandümo, ŋga ro  
 Godimbo didibafinda samboanahi," mehupuri. <sup>33</sup>Asu ai Pita, Sems,  
 Son ahamumbo yangiri sepurimündü haya mahu. Raniyu asu Sisas ai  
 ŋgusüfo pukiririhü ŋgusüfoambe moaruwai hohoanimomariri. <sup>34</sup>Raniyu  
 hoafiyupurühi yahuya, "Wandi ŋgusüfoambe pukirandirühi yifimbo  
 yangirayahi. Ŋga se ndühi ndondu nimandimo hibadüdi," mehu  
<sup>35</sup>Ai akidou sühüfi hu hifini amoembü amoearümbo nafi yagodohü  
 ana, tiŋirifo ra gübüsimbifoareandira yahu haya didibafimefiyu. <sup>36</sup>Ai  
 ndare didibafifihü yahuya, "Ape, wandi Ape, se yifirayafi ana wambo  
 tiŋirifoembü moatükuni ra raguanambo-ndowandi. Ŋga se yowani wandi  
 yifiri süngufepoani, ŋga sihafi yifiri süngundowandi," mehu <sup>37</sup>Ai hihirifi  
 hu himboyuwane ahambo süngururü-rundeimbi ranai mapomondamboyu.  
 Ai Pitambo hoafiyundowohü yahuya, "Saimon, se apafühiyafi? Asu se  
 awi mami awa amboani yangiri nimarimbo ra waniyo?" mehu. <sup>38</sup>Asu  
 ai hoafiyupurühi yahuya, "Se hibadu niŋgomombo didibafindafundi,  
 ŋga sihamumbo refe hoeifepurimbo tükündifeyoani pindimboemo.  
 Anihondane, ŋgusüfo ana refembo hohoanimoayosi, ŋga fiame nimborayo,"  
 mehu. <sup>39</sup>Asükai Sisas ai hihirifi hüfo weaŋgurühi didibafimefiyu  
 nahurai didibafimefiyu. <sup>40</sup>Ai asükai hihirifi hu himboyuwani ahambo  
 süngururü-rundeimbi ai yapombo himbomarapura mapomo. Raniyo  
 yangirimareapura, asu moai nini-hoafi ahambo hoafimbo fifirundi.  
<sup>41</sup>Sisas ai asükai ŋgimi noufimbü hihirifi süni himboyuwane ahambo  
 süngururü-rundeimbi ai apusimemo. Raniyo hoafiyupurühi yahuya, "Awi  
 se fiharu apomomboemo? Ndearambo rani-moatükuni ranai tüküfehü  
 Nindou Hondümbo moaruwai hohoanimoyomondeimbi-yomondi  
 warihü-rüwurimboanemo. <sup>42</sup>Hoeiru, nindou-yomondi warihüfendirimbo  
 nindou-mayu ranai tüküfimboani. Ŋga botiyafu houmbo ŋgefo," mehu.

**Sisasimbo mbumaründümo**

*(Matyu 26:47-56; Ruk 22:47-53; Son 18:3-12)*

<sup>43</sup>Sisas ai wataporimborandühi nünguane Sudas süngururü-rundeimbi 12 ambeahindi mami ai tüküme fiyu. Godimbo sesi sihou-rundeimbi bogori nindouyomo asu Suda-yafe bogori nindouyomo ranai nindou afindi safi ranahamumbo koamarihou pura pisao yihimindi asu nimihari fufuründümo houmbo ahinümbi hohoanimo fifirundeimbi babidimbo mahomo. <sup>44</sup>Nindou sapo Sisasimbo nindouyomond warihöfimbomayu ranai nindou afindi ranahamumbo dibo hoafiyupurühi yahuya, “Nindou ro wakikihindihünani animbo aiani, nga se ahambo mbundurindimo houmbo ndondu hibadüri ngomo,” mehupuri. <sup>45</sup>Raniyo Sudas ai nimehünou hu Sisasimbo hoafiyundowohü yahuya, “Yamundo-randeimbi,” yahuhü wakikihimarüri. <sup>46</sup>Raniyo nindou ranai Sisasimbo wariyomo homo mbumaründümo. <sup>47</sup>Nindou akimi burimemo ranambeahindi mami ranai ahandi pisao hüramündi haya Godimbo sihai-randeimbi adükari bogorindi ratüpuriyu randeimbimbo harimeindo. Raniyo ahandi ngorü himbo hoeari mafafoareando. <sup>48</sup>Asu Sisas ai hoafiyupurühi yahuya, “Se pisao asu nimihari fufuründümo houmbo wambo kikihemindirimbo masifomo ra hümbugünümbi nindoumbo kikihimindimbo nahurainemo. <sup>49</sup>Ro si mamami-rihandühi se babidimbo nimarimbo Godindi worambe nindou yamundihearü marihandi ra asu se moai wambo kikihiründümondiri. Nga Baiborambe hoafimayo ra anihondü tükümbifeyoamboane,” mehu. <sup>50</sup>Raniyo ahambo süngururü-rundeimbi ranai hiniñgiriwuri houmbo pomefoundi. <sup>51-52</sup>Nindou hoarifi mami ai kifohi hoeari yangiri güde haya Sisasimbo süngumarüri hüfu. Asu ahambo kikihiründümondane hoeari yangiri kikihimaründümonda safi yangiri mafifoendi.

**Sisasimbo kansiri yomondi himboahü papi hoafimarihori**

*(Matyu 26:57-68; Ruk 22:54-55; Son 18:13-14, 19-24)*

<sup>53</sup>Sisasimbo mburündümo mburumbo Godimbo sihai-randeimbi adükari bogori hondündi worambe, Godimbo sihou-rundeimbi, bogori nindou asu ahinümbi hohoanimo fifirundeimbi gugureafu nimarimondani sowaründümo mahomo. <sup>54</sup>Sowaründümo mahomondamboyo Pita ai akidou angunisafi süngumarapuri hu. Ai hu Godimbo sihou-rundeimbi-yomondi bogori hondündi worambe kefuai prisman babidimbo haihü mamarimo. <sup>55</sup>Godimbo sesi sihou-rundeimbi bogori asu muñguambo kansir ai nini-moaruwai moatükunirandi Sisas ai ramareandi ra fifirifembo-hünda kokomarundi. Ahambo hifokoeffimbo-hünda ahandi moaruwai hohoanimo fifirifembo-hünda kokomarundi, nga ai moai nini-akidou amboani moaruwai rareanda fifirundi. <sup>56</sup>Nindou

afindi ahambo tikarihori hehi papi hoafimarihori, nga ahei hoafi ra yimbusümoane. <sup>57-58</sup>Nindou bidifiri ai Sisasimbo papi hoafimbo yahomo houmbo niŋgomombo hoafiyomondühi yahomoya, “Ro himboriyefani ai hoafiyuhi yahuya, ‘Godindi wori nindou ahamundi warinambo worimbomarundi ra biriboadiheamboyah. Asu ro ŋgimi si yangiri asükai nindou warina worimbokoateyeimbi wori ra worimbondihamboyah,’ mehu,” mehomo. <sup>59</sup>Ŋga asu ahamundi hoafi wataporimbomarundi ranai simogodühi hoafikoate mamikari wataporimboru wakimarundi. <sup>60</sup>Godimbo sihai-randeimbi adükari bogori ai kansriyomondi himboahü botifi nüngumbo Sisasimbo düdurirühi yahuya, “Nimboe papi hoafarunini ranahambo simbori hoafikoateayafa?” mehundo. <sup>61</sup>Ŋga Sisas ai ahamumbo moai nini akidou amboani hoafiyupuri. Asükai sesi sihai-randeimbi ai düdurirühi yahuya, “Se God aboedani sei rihündeimbi ahandi nimori Kraisi-yafi, waniyo?” mehu. <sup>62</sup>Asu Sisas ai hoafiyuhiya, “Rananahi. Rananimbo se muŋguambo hoeindihorani Nindou Hondü ai God Ŋginindeimbindi warihondü warani nimandümbui asu sünambeahindi mburingai dibonde kudümbui,” mehu. <sup>63</sup>Godimbo sihai-randeimbi adükari bogori ranai ahandi fihindi hoeari hireandühi hoafiyupurühi yahuya, “Ŋgiri nindou ŋgorü ai moaruwai ramareandi ranahambo hoafindu. <sup>64</sup>Se himbori-yomondani ai Godimbo tirifoefe hoafimayu. Se hohoanimoyomondani sihiri ahambo nini-nününgumandihura?” mehuamboemo. Asu muŋguambo ai hoafiyomondühi yahomoya, “Ai moaruwai ramareandi ranimbohünda yifimbiyu-wamboane,” mehomo. <sup>65</sup>Bidifiri ai ŋguri tifiyafundo asu hoearinambo himboari gabudifoaru mburumbo harimemondo. Ai hoafiyomondühi yahomoya, “Hoafiyafi düdi sihambo harimayu ra,” mehomo. Raniyo asu prisman ai sowaründümo houmbo harimemondo.

#### **Pita ai Sisasimbo ro moai fifirihini mehu**

*(Matyu 26:69-75; Ruk 22:56-62; Son 18:15-18, 25-27)*

<sup>66</sup>Pita ai hoafi yibobofe wori giniri mbusümondühi nimaruwane Godimbo sihai-randeimbi adükari bogorindi ratüpuriyo randeimbi yihoarifi ai tüküme Feyo. <sup>67</sup>Ai hoeirerane Pita ai haihü mamaruwa himboari pareri niŋgombo hoafiyohü yahoya, “Seamboani Sisas Nasaretihündi dibombo manimbafane,” mehoamboyu. <sup>68</sup>Asu Pita ai wani yahu hoafiyuhi yahuya, “Se hoafayafi ranana ro moai fifiriheandi,” yahu haya wori yipurikimi mahu. <sup>69</sup>Asu ratüpuriyo randeimbi ranai asükai hoeireri haya nindou akimi maningomo ranahamumbo hoafiyopurühi yahoya, “Nindou ndanai amboani ai diborihindani,” meho. <sup>70</sup>Ŋga asükaiyu Pita ai didimoyuhü wani mehu. Akidou hihiniŋgire mbura nindou maningomo ranai Pitambo hoafiyomondühi yahomoya, “Anihondü, seamboani Garirihünd-anafi, nga se ai diborihind-



anafi,” mehomo. <sup>71</sup>Asu asukai ai dabarifihi yahuya, “Se nindou wataporimboarihori ranana ro moai fifirihini,” mehu. <sup>72</sup>Ai rani hoafi ra hoafiyu hayamboyuane, nimehünou kakaro ai asukai hoafimayu. Raniyo Sisas ai Pitambo hoafiyundowohüya, “Kakaro ai yimbumbo hoafikoate-ayuanbe animbo ngimimbo wamboya moai fifirihini mbisamboyafi,” mehu ra hohoanimoyuhi asu Pita ai afindi aranimayu.

**Pairatimbo sowana Sisasimbo sowaründümo mahifomo**  
(*Matyu 27:1-2, 11-14; Ruk 23:1-5; Son 18:28-38*)

**15** <sup>1</sup>Siambe hondü Godimbo sihou-rundeimbi bogori, hifandirundeimbi nindou, ahinümbi hohoanimo fifirundeimbi munguambo kansir ai hoafi mamamberu masihoundi. Raniyo asu süngunambo Sisasimbo wari hüputüpurundümo mburumbo Pairat sowanambo sowaründümo mahomo. <sup>2</sup>Asu Pairat ai Sisasimbo düdurirühi yahuya, “Se Suda-yei adükari bogoriyafi?” Asu Sisas ai simbori hoafiyuhiya, “Se sihafihuari hoafayafisi,” mehu. <sup>3-4</sup>Godimbo sihou-rundeimbi ai afindi papi hoafimarura asu Pairat ai asukai düdurirühi yahuya, “Sihambo afindi papi hoafarunini. Asu se nimboe akidou amboani simbori hoafikoateayafa?” mehu. <sup>5</sup>Asukai Sisas ai akidou amboani hoafi-koatemayua Pairat ai mahepünifiyu.

**Pairat ai Sisasimboya yifimbiyu wamboane mehu**  
(*Matyu 25:15-26; Ruk 23:13-25; Son 18:39–19:16*)

<sup>6</sup>Munğu himbani Pasofa sesesi si tüküfeyoambe Pairat ai karabusambeahindi nindou mami aboedambo hiniğiriri-marandi. Nimorehi nindowenihi ranai aheihuari ndüri dükarioranane hiniğirerü marandi. <sup>7</sup>Ranisimboani nindou mami ahandi ndüri Barabas ai nindou bidifiri sepurimündü haya gafman babidimbo yifiariyomo nindou hifokoamarunda karabusimarüpuri. <sup>8</sup>Nindou afindi ranai gugureandühiyo Pairatimbo horombo aheimbo yaremarandi rasüngufembo düdumehindi. <sup>9</sup>Asu Pairat ai düdurerühi yahuya, “Se hohoanimoyeyani siheimbo sowana Suda-yei adükari bogori ra aboedambo koandihininimboyo?” mehu. <sup>10</sup>Sapo Pairat ai ndore fifireandi Godimbo sesi sihou-rundeimbi ai Sisasimbo ngusüfoambe moaruwaiyomondühiyo ahambo sowana koamarihawuri. <sup>11</sup>İğa Godimbo sihou-rundeimbi ai nindou afindi ranaheimbo hohoanimo botimarundüri Sisasimbo ana yowani aboedambofipoani, ığa Barabasimbo animbo, yahomo houmbo. <sup>12</sup>Asukai Pairat ai düdureandürühi yahuya, “Se hohoanimoyeyani, ro nini-nününgu mandihini se Suda-yei adükari bogori sei arihündi ranahambo-a?” mehuamboyei. <sup>13</sup>Asu ai asukai hoafi karihehindühi seiya, “Nimi keimbi karihendeimbifihi tikoemündü pefimboani,” masei. <sup>14</sup>Asu Pairat ai düdureandürühi yahuya, “İğa

asu nine-moaruwai ramareanda?” mehuamboyei. Asu ai pukuna hoafi karihehindühi seiya, “Nimi keimbi karihendeimbi-fihi tikoemündü pefimboani,” maseiamboyu. <sup>15</sup>Raniyo nindou afindi ranai hihifi-hihifimbeyeia yahu haya aheimbo sowana Barabasimbo koamariheirü. Asu amimbo hoafimayua Sisasimbo ndüfuri ndüfuriruri mburumbo nimi keimbi karihendeimbi-fihi tikoemündi pefimbohünda ami-yomondi warihumariri.

**Ami ai Sisasimbo tirifoefe hoafimaruri**  
(*Matyu 27:27-31; Son 19:2-3*)

<sup>16</sup>Ami ai Sisasimbo sowaründümo homo Rom gafmani-yomondi adükari wori, Pretoriam seimarihündi, ranambe hiningirüwuri houmbo ami bidifirambo hoafimemonda gugurimefundi. <sup>17</sup>Raniyomo hoeari yimindibadi-hounduwöhüyo hamburi hoeari güdindo mburumbo tihoari tihoarümbi wofinambo at nahurai nafiru mbiroambe kikimafoarundo. <sup>18</sup>Raniyo ai Sisasimbo hoafiyomondühiya, “Suda-yafe adükari bogori, karihasi,” mehomo. <sup>19</sup>Raniyo ahambo nimiharinambo mbirowöhü hariyomondo, nguri tifiyafundo, adükarimbo hohoanimombo rawefundi nou tikarhou yimindihona nimarimo raraomarundi. <sup>20</sup>Ai ahambo tirifoefi hoafimbo mungua-moatükuni ra raru mburu asu hamburi hoeari güdymarundo ra yimindi-ründümondühi asükai ahandi hondü ra güdymarundo. Mungu-moatükuni raraoru mburu nimi keimbi karihendeimbi-fihi tikoemündi pefimbo sowaründümo mahomo.

**Sisasimbo nimi keimbi karihendeimbfihi tikoründümo pamarüwuri**  
(*Matyu 27:32-44; Ruk 23:26-43; Son 19:17-27*)

<sup>21</sup>Sisasimbo sowaründümo houmbo heihüyei Sairinihündi nindou mamü, ahandi ndüri Saimon, Areksander Rufus-yafandi afindi ai adükari ngofinambo masüfuwa hoeimarihori. Raniyo ami ai sowaründümo houmbo hoafimemondoa Sisasindi nimi keimbi karihendeimbi ra masemündu. <sup>22</sup>Raniyo Sisasimbo sowaründümo homo Gorgota sei arihündi ranihü tükümehindi. Gorgota ranahandi nimindi ra mbirihapiri-ane. <sup>23</sup>Ranühiyo ami ai Sisasimbo wain hoeambe hühütimbü marasen fanduyamundu mburu masabudo, nga ai moai sümündu. <sup>24</sup>Raniyo ami ai ahambo nimi keimbi karihendeimb-fihi parüwuri mburumbo ahandimayo hoeari-napo ra yimbuemindimbo yahomo hou satu piraimemo. <sup>25</sup>Sapo Sisasimbo nimi keimbi karihendeimb-fihi pamarüwuri ra siambeahi hüfihamindi kehuri süfuambeyo. <sup>26</sup>Ahambo papi hoafi sürü paru mburu ranai yare hoafiyowöhü yahoya, “SUDA-YAFE ADÜKARI BOGORI,” meho. <sup>27-28</sup>Asu Sisasindi fikimi nindou yimbu yifiariyafani hümbuhüniyafani rinandeimbi ahafanimbo amboani tikorüpindümo pamarupiri. Ngörü Sisasasindi kadüdani parüwuri asu ngörü warihondani parüwuri. <sup>29</sup>Raniyei

nindou afindi ranai ngasündihori heiheirühündühi mbiro hirihirihündühi ahambo tirifoefe hoafi hoafiyeihi “Sapo se safiya ‘Godindi wori birifoefe hefe ngimi sihi yangiri worimbondihini hiniḡindiheamboyahini,’ masafi. <sup>30</sup>Hapondani se sihafi fimbo farihoefi. Se nimi keimbi karihendeimbi fihindi foarefoa hawambo kosafi,” masei. <sup>31</sup>Asukai mami yahurai Godimbo sihou-rundeimbiyomo asu ahinümbi hohoanimo yamundu-rundeimbi-yomo ai-amboani tirifoefe hoafimaruri. Ai ahamundihoari raru hoafiyomondühi yahomoya, “Ai nindou amurambo aboedamboreandüri-marandi, nga asu moai ahandi fimbo aboedamboreandi. <sup>32</sup>Krais Israeriyei adükari bogori ranai nimi keimbi karihendeimbi ra hiniḡgire haya mbikusifuendi. Rananimbo sihiri hoeindihurühi ahambo anihondümbo-ndihurimboane,” mehomo. Nindou yimbu Sisasindi fikimi pamarupiri ai-amboani mami yahurai Sisasimbo tirimafoarineri.

### Sisas ai yifimayu

(*Matyu 27:45-56; Ruk 23:44-49; Son 19:28-30*)

<sup>33</sup>Hüfinimbo rani hifihü nimbi ranai peyo haya ho hombo hüfihamindi wuwuriyuambe tüküme Feyo. <sup>34</sup>Hüfihamindi wuwuriyuambe Sisas ai puküna heiyuhü yahuya, “Eri, eri, rema sabaktani?” mehu. Hoafi ranahandi nimindi ra ndahuraiane: Wandi God, wandi God, nimboe se wambo hiniḡgimarowandiri. <sup>35</sup>Nindou bidifiri akimi manimboei ranai himboriyei hehi hoafiyeihi seiya, “Himboriyei, ai Erasamboani miḡgayu,” masei. <sup>36</sup>Ahei mbusümonindi nindou mami ai pipiyu hu poposi moatükuni nahurai semündü mbura wain hoe ranambe foare mbura nimiharifihi pare himondamündi haya masagado. Nga asu bodimondi ai hoafiyeihi seiya, “Awi hoeindihu mbundihumbo, Erasai ai ahambo farihefimbo tükümandifiyu, wanimandiyo?” masei. <sup>37</sup>Asu Sisas ai asukai puküna heiyu mbura yifimayu. <sup>38</sup>Refihiyu asu Godindi worambe hoeari kumarundi ranai nimoamo ngahi peyo haya bure hanimbo gebü hifini türeandühi yimbumbore bumareandi. <sup>39</sup>Asu ami-yomondi bogori Sisasindi fikimi manüḡu ranai ai yifimayu ra hoeireanda mayoa hoafiyuhi yahuya, “Anihondane, nindou nda Godindi nimor-ani,” mehu. <sup>40</sup>Nimorehi bidifiri ai akidou anguni safi ni boadei himboapomaye. Ahei mbusümo ra Maria Makdarahündiyo, Maria, Sems Sosep-yafandi hondiyu asu Saromeyo. <sup>41</sup>Sapo Sisas ai Garirihini nüḡuambe nimorehi raniyei Sisasimbo süḡgurihorühi farihehori marihündi. Asu amuri bidifiri nimorehi Sisas babidimbo Serusareminambo mahei ai-amboani ranühi manimboei.

### Sisasindi yifi nimoko hoḡguambe masihehori

(*Matyu 27:57-61; Ruk 23:50-56; Son 19:38-42*)

<sup>42-43</sup>Sosep Arimateahündi ai kansiriyu haya müḡguambo nindou ai aiana aboedani sei hehi ahinirihori hündeimbiyu. Ai-amboani God

nginindi hifandarandi ranahambo himboyu-marandi. Sümbö moani ngoafimbo nimarimboane yaho yimuŋgurifeambe Sosep ai yihimbokoate hu Pairatindi himboahü nüŋgumbo Sisasindi finimoko semündumbo düdumefiyu. <sup>44</sup>Pairat ai Sisas yifimayu hoafi ra himboriyu haya hepünimefiyu. Raniyo ami-yomondi bogorimbo mborai mehuamboyu mahua Sisas ai yifimbaiyu waniyo yahu haya düdumariri. <sup>45</sup>Ami-yomondi bogori ranai hoafimayua himboriyu haya Pairat ai Sosepimboya yifi nimoko ra ndoarindifi, mehundo. <sup>46</sup>Sosep ai hu kifohi hoeari mami pemiyu mbura Sisasindi yifinimoko foarümündi hoearambe pariri ŋgamondifoariri mbura serümündi hu hoŋguambe masiheiri. Hoŋgu ra nimoei nimariweimbändambo nindou hütü wowondimarundiyo. Raniyo Sosep ai nimoei adükari ŋgorü gügüra hu hoŋgu nafitambe ra güre pare hiniŋgimareandi. <sup>47</sup>Raniyo Maria Makdarahündiyo asu Maria Sosepindi hondiyö ai Sisasimbo masihawuri ra nimbafe himboapomayafe.

### Sisas ai yifihündi botimefiyu

(Matyu 28:1-8; Ruk 24:1-12; Son 20:1-10)

**16** <sup>1</sup>Moani ngoafimbo nimarimbo si ranai muŋguyowane, Maria Makdarahündiyo, Maria Semsindi hondiyö asu Sarome ai Sisasindi yifinimoko popoaimbo sei hehi bidifiri aboedi fisiŋarümbü moatükuni pemimaye. <sup>2-3</sup>Raniyo Sande siambehöndü nafimbo hüsihü ai aheihoari simbori hoafiyeihü seiya, “Didai sihefimbo fandihemuni hayambo hoŋgu nafitambehündi nimoei ra ndemündü yihirimandea?” masei. <sup>4</sup>Nimoei ranai afindi hamindiyo, ŋga ai hei himboyeiane nimoei ra yihiramarundi. <sup>5</sup>Ai hoŋgu ranambe kefoehi hei himboyeiane, nindou hoarifi mami hoandari hoeari kifohi güde haya warihöndü warani mamaruwa hepünimehindi. <sup>6</sup>Nindou ranai hoafiyundürühi yahuya, “Se yowani hepünifepoani. Ro fifiriheambo-anahi, seana Sisas Nasaretihündi nimi keimbi karihendeimb-fihü pamarihori ranahamboane kokoarihori. Aiana asükai yaŋgiri botimefiyu! Aiana moai ndanühi yaŋguru. Ahambo masihehori fondi ra hoeirihü. <sup>7</sup>Ŋga se ŋgei ahambo süŋgururü-rundeimbi asu Pitambo amboani hoafindei. Sisas aiana sihamumbo Garirinambo horombofi haya mahu. Horombo hoafimayu süŋgu Garirihü animbo hoeindiwurimboemo,” mehu. <sup>8</sup>Nimorehi ranai hoŋguambeahindi tüküyahi hehi mafeföhindi. Ŋgusüfoambe hepünahi hihamindariyei hehi yihimboyeihiwambo moai nindou mamimbo amboani mami hoafi amboani hoafiyei.

### Maria Makdarahündi ai Sisasimbo hoeimareri

(Matyu 28:9-10; Son 20:11-18)

<sup>9</sup>Sisas ai Sande siambeahihöndü botifi-hayamboyu Maria horombo Sisas ai moaruwai nendi 7 hefoareandeimbi ahambo-so boatei

tüküme fiyu. <sup>10-11</sup>Nindou horombo Sisas babidimbo hoahoangomo marundi ranai afindi hohoanimoyomondühi araniyomondühi nimarimondane, Maria ai ho hoafiyopurühi yahoya, “Sisas ai yangiri manünguwa ro hoeimarihini,” meho. Ai hoafi ra himboriyomosi, nga moai anihondumbo-rundi.

**Süngurineri rinandeimbi yimbu ai Sisasimbo nafini hoeimarineri**  
(Ruk 24:13-35)

<sup>12</sup>Asukai süngunambo ahambo süngurineri-rinandeimbi ai nafisüngu hafandane, Sisas ai ngorüpoanimbo fiyu haya hu ahafanimbo-so tüküme fiyu. <sup>13</sup>Asu ai hafani süngururü-rundeimbi bodimondambo rani hoafi ra wataporimbomarinandi. Nga ai moai ahafandi hoafi ra anihondumbo-rundi.

**Sisas ai ahambo süngururü-rundeimbimbo-so tüküme fiyu**  
(Matyu 28:16-20; Ruk 24:36-49; Son 20:19-23; Ratipuri 1:6-8)

<sup>14</sup>Bidifiranambo hondü ahambo süngururü-rundeimbi 11 ahamumbo-so sesi sowasümondühi nimarimondani tüküme fiyu. Raniyo ahambo süngururü-rundeimbi ai ngusüfoambe tapihaniyomondühi nimorehi nindowenihi ai yangiri botimefiyua hoeirihori hehi hoafimayei ra anihondümbofekoate-memonda nginindi hoafimayupuri. <sup>15</sup>Asu Sisas ai hoafiyupurühi yahuya, “Se münguambo hifi ra hoahoangomondühi münguambo nindoumbo aboedi hoafi ra wataporimbondündüri. <sup>16</sup>Nindou düdi ai anihondümbore haya hundürayu ana, God ai ahambo aboedambo-ndirümbui. Nga nindou düdi ai anihondümbofe-koateayu ana, ai Godindi nindou-yafe hoafi himboriyohü yibobofe ranambe awarindihoembui. <sup>17</sup>Anihondumbo-rihindeimbi ranahei warisüngu God ai hepünifeimbi moatükuni randeambui. Ai wandi ndürinambo moaruwai nendi heboadihi asu ranipoanimbo hoafinambo hoafindei raraondihümboyei. <sup>18</sup>Ai amoasiri warinambo kikihindihümündi asu nindou ai simindei hehi yifiyei rihündeimbi moatükuni asimindei amboani ranai ngiri moaruwaimbondeandüri. Asu ai angünümbi nindou-yeiwami wari nandihinda ai asukai aboedindeimboyei,” mehupuri. <sup>19</sup>Adükari Sisas ai ahambo süngururü-rundeimbimbo wataporimbomrapuri mbura God ai sünambe serümündi hafu hinigirira ahandi warihondü warani mbamarü. <sup>20</sup>Asu ahambo süngururü-rundeimbi ai münguambo hifi hoahoangomondühi wataporimbomarundi. Asu Adükari ai ababidimbo nüngumbo ahamundi hoafi ra nginemindimbo-hünda hepünifeimbi moatükuni yare-marandi.